

編何以外言以志例所不載也不載何以載以通紀事之窮亦足備遺文之考也故凡章之先達其文卓有可傳不得拘以墟與已見舊志而淆列藝文者悉釐正而登選焉統目之曰外編

貽張衡書

舊志載藝文

隋房彥謙

竊聞賞者所以勸善刑者所以懲惡故疎賤之人有善必賞尊貴之戚犯惡必刑未有罰則避親賞則遺章邱縣志

卷十六

外編上

一

賤者也今諸州刺史受委宰牧善惡之間上達本朝懾僮憲章不敢怠慢國家祇承靈命作民父母刑賞曲直升聞於天寅畏照臨亦宜謹肅故文王云我其夙夜畏天之威以此而論雖州國有殊高下懸邈然憂民慎法其理一也至如并州釁逆須有甄明若楊諒實以詔命不通慮宗社危逼徵兵聚眾非為干紀則當原其本情議其刑罰上副聖主友于之意下曉愚民疑惑之心若審知內外無虞嗣後纂統而奸亂樂禍妄有覬覦則管蔡之誅當在於諒同惡相濟無所逃罪梟懸孛戮國有常刑其間乃有情非協同力

不自固或被擁逼淪陷凶威遂使籍沒流移恐爲冤
濫恢恢天網豈其然乎罪疑從輕斯義安在昔叔向
寘鶩獄之死晉國所嘉釋之斷犯蹕之刑漢文稱善
羊舌寧不愛弟廷尉非苟違君但以執法無私不容
輕重且聖人大寶是曰神器苟非天命不可妄得故
蚩尤項籍之驍勇伊尹霍光之權勢李老孔亍之才
智呂望孫武之兵術吳楚連磐石之據產祿承母后
之基不應歷運之兆終無帝王之位况乎蕞爾一隅
蜂扇蟻聚楊諒之愚鄙羣小之凶慝而欲憑陵畿甸
覬幸非望者哉開闢以降書契云及帝皇之跡可得
章邱縣志

卷十六

外編上

二

而詳自非積德累仁豐功厚利孰能道洽幽顯義感
靈祇是以古之哲王昧旦丕顯履冰在念御朽兢懷
逮叔世驕荒曾無戒懼肆於民上騁嗜奔慾不可具
載請略陳之曩者齊陳二國並居大位自謂與天地
合德日月齊明罔念憂虞不恤刑政近臣懷寵稱善
而隱惡史官曲筆掩瑕而錄美是以民庶呼絕終閉
塞於視聽公卿虛譽日敷陳於左右法網嚴密刑辟
日多徭役煩興老幼疲苦昔鄭有子產齊有晏嬰楚
有叔敖晉有士會凡此小國尚足名臣齊陳之疆豈
無良佐但以執政壅蔽懷私徇軀忘國憂家外同內

忌設有正直之士才堪幹持於己非宜卽加擯壓倘
遇諂佞之輩行多穢匿於我有益遽蒙薦舉以此求
賢何從而至夫賢材者非尚膂力豈繫文華唯須正
身負載確乎不動譬棟之處屋如骨之在身所謂棟
梁骨鯁之材也齊陳不任骨鯁信近讒諛天高聽卑
監其淫僻故總收神器歸我大隋向使二國祇敬上
元惠恤鰥寡委任方直斥遠浮華卑菲爲心惻隱爲
務河朔疆富江湖險隔各保其業民不思亂秦山之
固弗可動也然而寢卧積薪晏安鳩毒遂使禾黍生
廟霧露沾衣弔影撫心何嗟及矣故詩云殷之未喪
章邱縣志

卷十六

外編上

三

師克配上帝宜鑒於殷駿命不易萬幾之事何者不
須熟慮哉伏惟皇帝望雲就日仁孝夙彰錫社分珪
大成規矩及總統淮海盛德日新當璧之符遐邇僉
屬讚歷甫爾寬仁已布率土蒼生翹足而喜并州之
亂變起倉卒職由楊諒詭惑誑誤吏民非有構怨本
朝棄德從賊者也而有司將帥稱其願反非止誣陷
良善亦恐大黠皇猷足下宿當重寄早預心膂粵自
藩邸柱石見知方當書名竹帛傳芳萬有稷契伊呂
彼獨何人旣屬明時須存審諤立當世之大誠作將
來之憲範豈容曲順人主以愛虧刑又使脅從之徒

橫貽罪譴忝蒙眷遇輒寫微誠野人愚瞽不知忌諱

諫伐高麗疏

舊志載
藝文

唐房元齡

臣聞兵惡不戢武貴止戈今上古所不臣者陛下皆臣之所不制者陛下皆制之矣爲中國患無如突厥而大小可汗相次束手弛辯握刀分典禁衛延陀鐵勒披置州縣高昌吐渾偏師掃除惟高麗歷代逋命莫克窮討陛下責其弒逆身自將六軍征荒裔不旬日拔遼東虜獲數十萬殘衆孽君縮氣不敢息比功較德萬倍前王且陛下拔將於行伍之中取士於凡庸之末加以留情墳典屬意篇什筆邁鍾張辭窮班章邛縣志

卷十六

外編上

四

馬撫萬姓以慈遇羣臣以禮褒秋毫之善解吞舟之網逆耳之諫必聽膚受之愬斯絕降乘吮思摩之瘡登堂臨魏徵之樞哭戰亡之卒則哀動六軍負填道之薪則精感天地衆美兼備臣深爲陛下惜之重之愛之寶之易曰知進退存亡而不失其正者其惟聖人乎蓋進有退之義存有亡之機得有喪之理爲陛下惜者此也傳曰知足不辱知止不殆陛下威名功烈旣云足矣拓地開疆亦可止矣邊夷醜種不足待以仁義責以常禮古者以禽魚畜之必絕其類恐獸窮則搏苟赦其死且陛下每決死罪必三覆五奏進

蔬食停音樂以人命之重爲感動也今士無一罪驅
之行陣委之鋒鏑肝腦塗地魂魄無歸老父孤兒寡
妻慈母望樽車而掩泣抱枯骨以摧心足以變動陰
陽傷害和氣實天下之痛也使高麗違失臣節誅之
可也侵擾百姓滅之可也長能爲中國患夷之可也
今無是三者而坐敝中國爲舊王雪恥新羅報仇非
所存小所損大乎臣願下沛然之詔許高麗自新焚
陵波之舩罷應募之衆自然華夷慶願遠肅邇安卽
死骨不朽

我靈臺記

明李開先

章邱縣志

卷十六

外編上

五

新樂誠軒賢王使使持書相示曰我靈臺乃端惠先
王考養心之處也築在嘉靖辛丑抵今辛酉二十年
矣久而有當修飾者幸已畢工不可不文以記之乃
以記文委之中麓山人山人因對使辭之曰誠軒已
白有佳記矣茲不已複乎使知其意應曰前記乃初
築此則并修飾記之耳山人乃嘆曰使乎使乎記可
得已乎夫人以一心而爲靈諸念雖異同是一心之
緣起前心是有念妄心動而有迹後心是無念真心
止而無形有念心如物象可思量無念心如虛空不
可推測所謂明鏡亦非臺本來無一物者也座客聞

言以爲出於禪心不靜虛則谷神不靈能澄其心則神清而三脉通靈矣故虛其心不見可欲使心不亂所謂洞房紫極靈門戶者也座客又以爲出於老心具五行之理以虛靈故也心比性有迹比氣則自然又靈靈處是心虛靈又是心之本體心官至靈藏往知來知覺是心之靈所覺者心之理能覺者氣之靈也心麗於陽而乘其氣無間於動靜卽神之會也陽主動晝則陰伏藏神運而魄隨陰主靜夜則陽伏藏魂定而神蟄故心大則百物皆通巨極無際細入無倫前乎開闢而未嘗古後乎叔季而未嘗今故有比

章邱縣志

卷十六

外編上

六

之以火者有比之以郛郭者而靈臺則尤親切著明然有主則虛神守其都惟以敬爲主心之所以生而靈也所謂敬者聖學之成始成終也客以其言出諸孔孟程朱卽可爲我靈臺記因書而授之使者父子一心虛而受善謂其臺曰靈臺亦可也至其造作之詳及橋洞名義之異一覽前記自當知之今記直據靈臺爲之發揮云

原性堂記

李開先

茶陵有大人君子張龍湖者生爲保輔歿謚文隱素與中麓子善嘗同陪祀郊壇乃避衆獨執手相語曰

天下有不可無吾文而吾不能已吾文者原命原性是已原道原教俱有作者考選庶吉士曾以原教命題間亦能發古人所未發而命則未之及性雖及之然而未善也程明道雖善乃定性而非原性也尚以爲在鄴時少年之作若原命與性非老筆宿學無可屬者方今之世不吾則子計之熟矣盍勉諸諾其言而藏之於心今二十餘年矣近城園有一堂已名之曰面山矣客有過而謂予何不改稱原性乃愴然有感於前事而欣然卽易其舊名予方有意觸而卽發不知客何所見適投其機乎客退遂從而記之曰性

效天下之動心妙性情之德曰妙則有主宰運動之意矣人生而靜天之性也感物而動情之欲也物至知知好惡形而善惡分焉有流而爲惡者非性所本有也是皆先儒論性有見之言固無嫌於直述然以予論之理則如木之有文理性則如木之有剛柔松性凌霜柏性盤鬱竹梧疎秀茶梅冷淡荆棘針刺檮欒臃腫茶蘼顛弱皆其性也不獨木然如火性燥水性溼大黃性寒附子性熱馬之性健牛之性順皆與生俱生者也生之謂性告子亦不爲失但未能兼氣言之耳如韓昌黎原性有三品之說亦坐此失而猶章邱縣志

卷十六

外編上

八

臨許居之前突起一樓下爲門通來往上設榻恣臥
吟客有避風而登之者鈞簾北望大河喜謂子曰君
欲記此樓久矣竟不能踐其言乎予笑而戲答之曰
此予事而掛客懷何也不以食言而肥不因苦吟而
瘦試以數語爲記請覽而教正之如何夫天之噫氣
爲風地之陰氣爲水實則交相感而迭相乘風吹水
涌曰波風行水皺曰漣風微水如鳴絃風靜水如沉
璧風急水如戰鼓風怒水如驚雷速其行舟者風有
意也任其拍橋者風不管也不但爲天下之至文而
亦天下之至音音徹卧中興發醉後而詩意有出言
章邱縣志

卷十六

外編上

十一

外者和以沙鳥雜以漁歌助予吟懷者又不止水風
而已樓高而聞之最真信口朗吟詩數雖多俱不曾
落紙筆且多誦古詩及近時名詩此水風卧吟樓之
所由作而記文之所由繼作也

海岱詩集序

李開先

世之爲詩有二尚六朝者失之纖靡尚李杜者失之
豪放然亦以時代南北分焉成化以前及南人纖靡
之失也宏治以後及北人豪放之失也譬之畫工筆
墨俗軟大筆墨麤蕩古有以禪喻詩者而畫亦有詩
理焉移生動質變態無窮蘊彩含滋隨心寫象縱橫

神妙烘染虛明此盡之大致也詩則尤未易言者感物造端因聲附氣調逸詞雄情幽興遠風神氣骨超脫塵凡非胸中備萬物者不能爲詩之方家而筆端有造化者始可稱盡之國工矣我朝名盡比之宋元雖少總之似不下百人而以戴吳陶杜爲最戴靜庵生成變化下視同行吳小仙健縱麓且簡者更不可及陶雲湖之細潤杜古狂之精竒皆擅長伎圃流聲藝林者也善詩者亦不下百人止以近似者論之唐荆川如戴李崆峒如吳薛西原高蘇門如陶如杜李才高而有出入三子者守法而酌量乎南北之間者

習橫制頽波與數子儷美爭鳴其有功於文教不小也嘗聞之人秋渠自秀才時刻意探古操筆摛文不古不休在史館與天下豪俊究講時務故其清補卒伍首關吏治大得軍情有埋輪激烈之風攬轡澄清之志而詩固其餘也趙尹刻於吾章以有得於海岱之助遂以海岱名集云詩有之曰無以我公歸兮無使我心悲兮有是集傳布可以慰我東人之思矣

議召買足餉疏

明甯光先

伏以邇年遼糧俱派買畿輔初令領價戶部每發不如期賢有司猶那借公帑不肖者遂履畝而稅迨部

章邱縣志

卷十六

外編上

三

銀發或徑歸私橐其後留地方雜項太倉京邊等銀扣作糴本而部派糧石多不按各府額銀臣昔令蠡邑時保定曾取給大名今真定又取給順天而彼此既分撥發驟難官遂有懸價之苦矣猶未及於民也至糧價之消長每隨時而因地部議之定值難曲合而遙揣如秋成不派民安能以升斗餬口者留作軍精春照秋買官安能以貴糴賤估者代民賠補此卽下令曰有司勿殃民也其誰從之哉况部旣短價墨吏更以尅價曰是不得以廉繩我者也不幾於剝之又剝乎及其解津也糧艘重務必託之富民而交納

催督須佐之衙役衙役遂有暗通船戶盜糧以賴鄉
愚者有扛幫津差需索以圖瓜分者或喚使守候或
歸縣誑稟而民之受其魚肉者更莫與愬矣此在豐
年猶爲蹙額而况荒歲乎今歲半犁春雨僅能播種
三伏屯膏秋稼全枯卽雨後晚禾又金氣相逼其且
乾而粒且灰矣臣郊行數百里連阡之景象乃爾黎
民之生命如何獨何心而能不涕零也不但扶老攜
幼流離滿目亦且民窮盜起所在見告府縣方爲請
蠲請賑微臣亦議煮粥發倉且此時糧價已高於今
春部價何待來春乎此卽徵銀已苦若再令糴糧也
章邱縣志

卷十六

外編上

十四

得寸則寸得尺則尺矣何苦不爲哉不見遼東之硝黃乎諸商何以競營買也更不見遼東之麥麩乎初何以航海而來者卽拚命所不顧則以利之所在民必歸之耳終何以邳山而積者爭減值以平販則以物之聚遂莫勝用耳以兵而自爲召商則然若官而代兵召商又何獨不然乎迺津門之獨憚此者雖鑿於滬爛之前轍亦以民買而一定之價官得爲政省之朝廷者但得錙銖而費之百姓者遂不惜巨萬官買而變易之價商得爲政騶從旣杜賄賂之孔官府又無羨餘之獲故咸知厲民而相習養癰也微臣灼章邱縣志

卷十六

外編上

五

知此弊故敢會同保定撫臣解經傳爲民請命伏乞皇上勅下新計臣新津撫大破因循猛力担当召買之役以來年爲始者卽從今日料理將臣屬遼糧三十餘萬倘全免派固足釋憾於天地卽不然而減派二十萬仍將坐派確數預先頒下俾有司趁秋措買庶幾哉災黎或不苦於迫索也以猶有備也總之此一役也一轉移而惠民兼以通商若膠柱而擾官因以病民是在皇上之自爲邦本計而已矣臣無任戰栗待命之至

伏以地道主靜動則反常况震而有聲更是天變之可駭愕者方今地方告災邊境多事災異之來此其徵應之矣臣不諳占候不敢妄爲牽合然按之記載謂陽伏而不能出陰迫而不能升地於是乎動証之時事人情凡有抑鬱而不能宣達者皆臣奉職無狀爲之招也畿南自去歲之冬歷春夏三時無雨赤地生烟秋種晚禾又遭冰雹十室九空小民不勝怨咨加之買米買豆之役征繕轉輸剝膚已極頃自插酋烽警關輔戒嚴營軍缺餉暋暋胥讒蓋合軍民上下無一非窮愁困迫之情天或以此譴示乎查兩次地

章邱縣志

卷十六

外編上

六

震聲若風雷俱來自西北以眞定視西北卽今宣大之方也插酋擁衆窺邊戰歎未有長策紫荆等關一重險隘卽是內地腹心除臣痛加修省并行大小官員共事消弭及申飭邊關將領嚴加隄備外竊意災異之來召致有因我皇上敬天法祖蕩陰邪扶陽明無復迫伏之患惟是民窮軍餒在在見告伏莽蠢動處處生心竊恐咎不虛生然而妖不勝善收人心以固邦本綢戶牖以綏四方是在聖主與中外臣工所當共加亟圖也

諫裁兵足餉疏

節錄

甯光先

伏以真定爲神京右臂防護實嘉賴之故舊設撫道
總鎮等官提督重兵於其間布置方略自古已然兵
不宜去槩可知矣前撫臣因舊兵援遼之遺精強俱
盡其餘疲羸之卒恐不足以資緩急又設兵五千名
馬一千匹簡除訓練屹然爲神京西南保障亦旣大
費一片深心亦何敢輕爲議裁惟是該撫旣稱有五
不可撤似不妨留之以爲三輔重地計然又從中撤
其一半止留兵二千五百名用餉三萬九千兩其餘
一萬五千扣解以充遼餉調停於內外戰守之間極
爲妥當奉旨是欽此是前撫臣於五不可撤之中撤
章邱縣志

卷十六

外編上

七

其半以充餉因虜氛漸緩插警未張亦屬萬不得已
今欲爲遼餉而盡撤此兵得非以真保爲腹裏乎然
地似腹裏境接宣雲自關門薊密以至昌平接連卽
爲馬水及紫荆倒馬處處可通狡虜無非要害之區
庚戌紫荆爲虜闖入之徑今插會數十萬逼處宣大
間客歲犯搶大同時離紫荆僅僅二百餘里從紫荆
二百三十里卽是都城也紫馬之軍十三月無餉豈
足扼虎豹之關所恃真定標選兩營五千兵稍可救
援接應所以元年五月內兵部因虜兵馳到大小凌
河題宜整兵救援本年六月內又因插會內犯緊急

兵部題請嚴加申飭且預行昌鎮眞保居庸紫馬等關露刃以待本年十月內奴蘇合兵與插漢爭殺兵部題請薊昌當嚴兵以待而山海亦須整救援之師國家事尚可言乎卽坐臣以封疆之罪其如腹心根本何也臣謂地方各有所急利害當權其重今日中外括搜竭海內而憂不給者雖爲餉總因插虜交訌虞單弱而不能支者實爲兵欲得實在之兵當查虛糜之餉非因不足之餉可裁有用之兵倘只計關門之騰飽而不顧肘腋之空虛卒有犯關緩急臣未知何以禦之且畿南天下咽喉錢糧輻輳每爲响馬所章邱縣志

卷十六 外編上

六

窺伺臣拿數起王明興等與張虎等二十餘人俱審係逃兵作盜而畿輔六郡深衡景武之間從來爲奸宄潛伏之藪妖賊于宏志之黨蔓尚潛滋近衡水縣大盜強劫拒捕殺傷鄉兵臣發營兵始擒賊首李連氣尹立夏立等招攀與河間東鹿等處實繁有徒正在議剿當此饑荒之際散此二千五百兵於一歲之間恐有地者歸之農挾技而不能資身者未可易言安帖也時當民窮財盡苟可節省以佐軍國若各營衛逃故銀兩臣已委各府推官劉正宗等星夜嚴行清查另疏奏報此外或於修防各營軍兵內再爲簡

汰裁老弱之殍饗爲精強之餉饋亦可稍爲通變第其月餉原薄裁去二千軍省餉可一萬餘兩蓋戶部原只欲得餉非必欲裁數年練成之兵若曰督師之疏已經部覆明旨不可易也則此兵之增屢奉戶部覆而皇上以虜插入犯屢次申飭移駐策應者何一非煌煌明旨也部臣老成籌國念遼重亦必念畿輔非輕念遼需餉急亦必念畿輔需兵非緩合無仍將真定選鋒營兵二千五百名留鎮操練庶王畿不至空虛緩急稍爲有備

劾違制建祠疏

節錄

甯光先

章邱縣志

卷十六 外編上

九

題爲仰遵明旨據實回奏事行據井陘道兵備右叅政都任呈蒙撫臣憲牌接邸報見禮部主事喬若雯奏前事內稱至私爲逆璫建祠者則饒陽縣知縣張已榮也見任自建生祠者則柏鄉縣知縣尹自任也一則智能使鬼一則財可通神百足不僵有勢益熱痛夫逆璫煽虐舉世諂諛若狂不惟頌德稱功甚且建祠崇報此其罪可一日容於堯舜之世乎饒陽最爾小邑何得亦建逆祠非縣官張已榮賂萬姓之脂膏其能侈媚權之觀美今據道府查勘謂建祠之舉山自鄉民畏禍之心蓋鄉民以饒陽鎮集接比肅寧

之境曾辱魏璫於微時後見魏勢漸張莫必旦夕之命遂借香火供奉冀保其身家捐地輸財不過數楹之屋於縣官張已榮原無干也第縣官身居民上不禁止且有聽從民便之批雖云璫勢薰天一令莫能違衆然衷情內荏旣乏強項之特操趨諾隨人終是依阿之柔骨但該縣士紳百姓合詞保留其官評無可訾議所當從重降處以示懲戒者也至於柏鄉縣知縣尹自任狐鼠橫行漁獵剝下小民已不勝疾視迺聽從市棍以見任而建立生祠貪而益之以愚穢德適彰其臭臣等久廉其劣狀欲加叅處適部臣章邱縣志

卷十六

外編上

二十

指摘及之所當照貪例革職以警官邪者也旣經道府勘明議詳前來相應會奏伏乞勅下部院再加叅詳覆議上請定奪施行

外編中

李格非里居

按大明一統志云格非濟南人山東通志云萊蕪人閱明水鎮西宋廉處士碑李迴跋云少從先伯父先考先叔西郊縱步三里許得廉先生之居云云觀之確是明水鎮人

李格非著作

李格非禮記精義十六卷寶慶二年十月上玉海

衛湜曰李文叔精義就曲禮檀弓王制喪服大

小記大傳少儀學記樂記雜記祭法十一篇中

隨所見為之義經義考

洛陽名園記一卷宋史藝文志

格非跋曰洛陽處天下之中挾殺龜之阻當秦隴

之襟喉而趙魏之走集蓋四方必爭之地也天下

常無事則已有事則洛陽必先受兵余故嘗曰洛

陽之盛衰者天下治亂之候也方唐貞觀開元之

間公卿貴戚開館列第於東都者號千有餘邸及

章邱縣志 卷十六 外編中 三

其亂離繼以五季之酷其池塘竹樹兵車蹂躪廢

而為邱墟高亭大榭烟火焚燎化而為煨燼與唐

共滅而俱亡者無餘處矣余故嘗曰苑囿之興廢

洛陽盛衰之候也且天下之治亂候於洛陽之盛

衰而知洛陽之盛衰候於苑囿之興廢而得則名

園記之作余豈徒然哉嗚呼公卿大夫方進於朝

放乎一己之私意而忘天下之治忽欲退享此樂

得乎唐之末路是矣本

張琰序曰山東李文叔記洛陽名園凡十有九處

自富鄭公而終於呂文穆其聲名氣焰見於功德

者遺芳餘烈足以想像其賢其次勢位尊崇與夫財力雄盛者亦足以知其人經營生理之勞又其次僧坊以清淨化度羣品而乃斥餘事種植灌溉奪造化之功與王公大姓相軋夫洛陽帝王東西宅爲天下之中土圭日影得陰陽之和嵩少瀍澗鍾山水之秀名公大人爲冠冕之望天匠地孕爲花卉之奇加以富貴利達優游閒暇之士配造物而相嫵媚爭妍競巧於鼎新革故之際館榭池臺風俗之習歲時嬉遊聲詩之播揚圖畫之傳寫古今華夏莫比觀文叔之記可以知近世之盛又可

以信文叔之言爲不苟且夫識明知審則應事精而信道篤隨其所見淺深爲近遠小大之應於熙寧變更天下風靡有所謂必不可者大丞相司馬公爲首後十五年無一不如公料者至今明驗大效與始言若合符節文叔方洛陽盛時足跡目力心思之所及亦遠見高覽知今日之禍曰洛陽可以爲天下治亂之候又曰公卿方進於朝放乎一己之私意忘天下之治忽嗚呼可謂知言哉文叔在元祐官大學丁建中靖國再用邪朋竄爲黨人女適趙相挺之子亦能詩上趙相救其父有云何

况人間父子情識者哀之今記稱潞公年九十而杖屨東西按太師丙午生正紹聖乙亥歲譴逐嶺表立黨之二年誣謗宣仁聖烈廢降昭慈獻聖羣陰已壯芽蘖弄權宰相不必斥其名後內相王明叟指言紹聖當國之人如操舟者當左而右當右而左旁觀者爲寒心與文叔所言放乎一己之私意而忘天下之治忽若相終始愚故曰其言正不苟且也噫繁華盛麗過盡一至於荆棘銅駝腥膻伊洛雖宮室苑囿滌池皆盡然廢興相循天地無盡藏安得光明盛大復有如洛陽衆賢佐中興之

章邱縣志

卷十六

外編中

三

業乎季父浮休侍郎詠長安廢興地有詩云憶昔開元全盛日漢苑隋宮已黍離覆轍由來皆在說今人還起古人悲感而思治世之難遇嘉賢者之用心故重言以書其首紹興八年三月望日幽國張琰德和序

本
書

按居易錄云洛陽名園記李格非譏而常州毛氏刊本乃訛爲華州李鴈譏鴈字方叔乃蘇門六君子之一且陽翟產非華州又訛之訛也

李格非文叔集四十五卷

文獻
通考

後村劉氏曰李格非詩文四十五卷文高雅條鬯

有義味在晁秦之上詩稍不逮元祐末爲博士紹
聖初爲禮部郎有挽蔡相確詩云丙吉勲勞猶未
報衛公精爽僅能歸豈蔡嘗薦引之乎挽魯直五
言八句首云魯直今已矣平生作小詩下六句亦
無褒詞文叔與蘇門諸人尤厚其沒也文潛誌其
墓獨於山谷在日以詩往還而些詞如此良不可
曉其過臨淄絕句云擊鼓吹竽七百年臨淄城闕
尚依然如今只有耕耘者曾得當時九府錢試院
五言云斗暄成小疾亦足敗吾勤定是朱衣吏乘
時欲舞文亦佳作

章邱縣志

卷十六

外編中

書

近世墨工多名手所製好墨士大夫留意詞翰者
往往多喜收蓄唯李格非文叔獨不喜之嘗著破
墨癖說云客出墨一函其製爲璧爲丸爲手握凡
十餘種以錦囊之詫曰昔李廷珪爲江南李國主
父子作墨絕世後二十年乃有李承曼又二十年
有張遇自是無繼者自吾大父始得兩丸於徐常
侍鉉其後吾父爲天子作文章書碑銘法當賜金
或天子寵異則以此易之余於是以兩手當心捧
硯惟謹不敢議

闕三字

余惟用薛安潘谷墨三十餘

年皆如吾意不覺少有不足不知所謂廷珪墨者

用之當何如也他日客又出墨余又請其說甚辨
余曰噓余可以不愛墨矣且子之言曰吾墨堅可
以割然吾割當以刀不以墨也曰吾墨可以置水
中再宿不腐然貯水當以盆罌不以墨也客復曰
凡世之墨不過二十年膠敗輒不可用今吾墨可
百餘年不敗余曰此又不足貴余墨當用二三年
者何苦用百餘年墨哉客辭窮曰吾墨得多色凡
用墨一圭他墨兩圭不逮余曰余用墨每一二歲
不能盡一圭往往失去輒易墨未嘗苦少墨也客
曰吾墨黑余曰天下固未有白墨雖然使其誠異

他墨猶足尚乃使取硯屏人雜錯以他墨書之使
客自辨客亦不能辨也因恚曰天下奇物要當自
有識者余曰此正吾之所以難也夫砥砭之所以
不可爲玉魚目之所以不可爲珠者以其用之才
異也今墨之用在書苟有用於書與凡墨無異則
亦凡墨而已焉烏在所可寶者嗟乎非徒墨也世
之人不考其實用而眩於虛名者多矣此天下寒
弱禍敗之所由兆也吾安可以不辨於墨文叔詞
翰之好乃不喜於墨此不可曉故并載之

墨莊漫錄

李文叔嘗有雜書論左馬班范韓之才云司馬遷

之視左邛明如麗倡黠婦清歌緩舞間以諧笑傾
蓋立至亦可喜矣然而不如絕代之女方且却鉛
黛曳縞紵施帷幄裴回微吟於高堂之上使淫夫
穴隙而見之雖失氣疾歸不食而死而終不敢意
其一啓齒而笑也班固之視馬遷如韓魏之壯馬
短鬣大腹服千鈞之重以策隨之日夜不休則亦
無所不至矣而曾不如腰裏之馬方且脫轡逸駕
驕嘶顧影俄而縱轡一騁千里卽至也范蔚宗之
視班固如勤師勞政手胝簿版口倦呼叱毫舉縷
詰自以爲工不可復加而僅足爲治曾不如武健

章邱縣志

卷十六

外編中

五

之吏不動聲色提一二綱目羣吏爲之趨走而境
內晏然也韓愈之視范曄如十室之邑百家之聚
有儒生崛起於蓬蓽之下詩書傳記鏘鏘常欲鳴
於齒頰間忽遇夫奕世公卿不學無術之子弟乘
高車從虎士而至雖鄙惡而體已下之矣文叔又
嘗雜書論文章之橫云余嘗與宋退叔言孟子之
言道如項羽之用兵直行曲施逆見錯出皆當大
敗而舉世莫能當者何其橫也左邛明之於辭令
亦甚橫自漢後千年惟韓退之之於文李太白之
於詩亦皆橫者近得眉山篔簹谷記經藏記又今

世橫文章也夫其橫乃其自得而離俗絕畦徑
者故衆人不得不疑則人之行道作文政恐人不
疑耳

同上

李格非善論文章嘗曰諸葛孔明出師表劉伶酒
德頌陶淵明歸去來辭李令伯陳情表皆沛然從
肺腑中流出殊不見斧鑿痕是數君子在後漢之
末兩晉之間初未嘗以文章名世而其詞意超邁
如此吾始知文章以氣爲主氣以誠爲主故老杜
謂之詩史者其大過人在誠實耳誠實著見學者
多不曉如玉川子歸醉詩曰昨夜村飲歸仆倒竟

章邱縣志

卷十六

外編中

七

三五摩挲青莓苔莫嗔驚着汝王荆公用其意作
扇子詩曰玉斧修成寶月團月邊仍有女乘鸞青

冥風露非人世鬢亂釵橫特地寒

釋惠洪冷齋夜話

元祐六年七月朔皇帝旣視朝翰林學士拜疏於
廷曰陛下卽位尊有德親有道詔舉賢良方正經
明行修藝文之士欲以幸教天下甚惠夫太學者
教化之原也且先皇帝初斥三學舍增弟子至三
千員惟聖上幸照臨其宮上以問丞相丞相曰學
士議是今歲屢豐賀海內誠無事而陛下聰明仁
孝好學出天性不因是以風動四方則事尚何可

爲者况祖宗之舊章皆在可考請下有司討論以
進制曰可以歲十月庚午駕自景靈宮移仗謁孔
子祠入門降輦步就小次由東階以升奠爵再拜
禮官告禮成然後退幸太學詔博士皆升堂坐諸
生兩廡下乃命國子祭酒講書之無逸終篇因而
幸武成王廟而還左丞相實從於是率諸公賦詩
以形容之在位者皆屬和十二月詩至太學祭酒
司業合其僚屬以謀之曰此太平希濶盛事也太
學何敢私有必刻金石以傳之天下爲稱且屬格
非序其本末格非竊惟成周之隆其人君起居動

章邱縣志

卷十六

外編中

三

作之美載於詩聲於樂者多出於左右輔弼之臣
而王之德意志慮至設官而傳道之不爲區區也
今丞相諸公賦詩與雅頌之作無異祭酒欲傳之
天下與道王之德意無異宜刻石不疑元祐七年
正月十日謹序此李公格非筆也諸公詩皆七言
以章庠行王堂爲韻凡三十六人

楓窗
小牘

李清照校勘金石錄三十卷

宋史藝
文志

清照後序曰右金石錄三十卷者何趙侯德夫所
著書也取上自三代下迄五季鐘鼎甌鬲盤匱尊
敦之款識豐碑大碣顯人晦上之事蹟凡見於金

石刻者二千卷皆是正譌謬去取褒貶上足以合
聖人之道下足以訂史氏之失者皆載之可謂多
矣嗚呼自王播元載之禍書畫與胡椒無異長興
元凱之病錢癖與傳癖何殊名雖不同其惑一也
余建中辛巳始歸趙氏時先君作禮部員外郎丞
相時作吏部侍郎侯年二十一在太學作學生趙
李族寒素貧儉每朔望謁告出質衣取半千錢步
入相國寺市碑文果實歸相對展玩咀嚼自謂葛
天氏之民也後二年出仕宦便有飯蔬衣練窮遐
方絕域盡天下古文奇字之志日就月將漸益堆

章邱縣志

卷十六

外編中

完

積丞相居政府親舊或在館閣多有亡詩逸史魯
壁汲冢所未見之書遂盡力傳寫浸覺有味不能
自己後或見古今名人書畫三代奇器亦復脫衣
市易嘗記崇寧間有人持徐熙牡丹圖求錢二十
萬當時雖貴家子弟求二十萬錢豈易得邪留信
宿計無所出而還之夫婦相向惋悵者數日後屏
居鄉里十年仰取俯拾衣食有餘連守兩郡竭其
俸入以事鉛槧每獲一書卽同共校勘整集籤題
得書畫彝鼎亦摩玩舒卷指摘疵病夜盡一燭爲
率故能紙札精緻字畫完整冠諸收書家余性偶

強記每飯罷坐歸來堂烹茶指堆積書史言某事在某書某卷第幾頁第幾行以中否角勝負爲飲茶先後中卽舉杯大笑至茶傾覆懷中反不得飲而起甘心老是鄉矣故雖處憂患困窮而志不屈收書旣成歸來堂起書庫大櫥簿甲乙置書冊如要講讀卽請鑰上簿開出卷帙或少損污必懲責措完塗改不復向時之坦夷也是欲求適意而反取膠慄余性不耐始謀食去重肉衣去重采首無明珠翡翠之飾室無塗金刺繡之具遇書史百家字不列闕本不譌謬者輒市之儲作副本自來家

章邱縣志

卷十六

外編中

三

傳周易左氏傳故兩家者流文字最備於是凡案羅列枕藉意會心謀目往神授樂在聲色狗馬之上至靖康丙午歲侯守淄川聞金人犯京師四顧茫茫然盈箱溢篋且戀戀且悵悵知其必不爲己物矣建炎丁未春三月奔太夫人喪南來旣長物不能盡載乃先去書之重大印本者又去畫之多幅者又去古器之無款識者後又去書之監本者畫之平常者器之重大者凡屢減去尚載書十五車至東海連艦渡淮又渡江至建康青州故第尚鑿書冊什物用屋十餘間期明年春再具舟載之

十二月金人陷青州凡所爲十餘屋者已皆爲燬
燼矣建炎戊申秋九月侯起復知建康府己酉春
三月罷具舟上蕪湖入姑孰將卜居贛水上夏五
月至池陽被旨知湖州過闕上殿遂駐家池陽獨
赴召六月十三日始負擔捨舟坐岸上葛衣岸中
精神如虎目光爛爛射人望舟中告別余意甚惡
呼曰如傳聞城中緩急奈何戟手遙應曰從衆必
不得已先去輜重次衣服次書冊卷軸次古器獨
所謂宗器者可自負抱與身俱存亡勿忘也遂馳
馬去途中奔馳冒大暑感疾至行在病牕七月末

章邱縣志

卷十六

外編中

三

書報卧病余驚怛念侯性素急奈何病牕或熱必
服寒藥疾可憂遂解舟下一日夜行三百里比至
果大服芫胡黃芩藥瘧且痢病危在膏肓余悲泣
倉皇不忍問後事八月十八日遂不起取筆作詩
絕筆而終殊無分香賣屨之意葬畢余無所之朝
廷已分遣六宮又傳江當禁渡時猶有書二萬卷
金石刻二千卷器皿茵褥可符百客他長物稱是
余又大病僅存喘息事勢日迫念侯有妹婿任兵
部侍郎從衛在洪州遂遣二故吏先部送行李往
投之冬十二月金人陷洪州遂盡委棄所謂連艦

渡江之書又散爲雲烟矣獨餘輕小卷軸書帖寫本李杜韓柳集世說鹽鐵論漢唐石刻副本數十軸三代鼎彝十數事南唐寫本書數篋偶病中把玩撥在臥內者巋然獨存上江旣不可往又虜勢叵測有弟述任勅局刪定官遂往依之到台台守已遁之剡出睦又棄衣被走黃巖僱舟入海奔行朝時駐蹕章安從御舟海道之溫又之越庚戌十二月放散百官遂之衢紹興辛亥春三月復赴越壬子又赴杭先侯疾急時有張飛卿學士攜玉壺過視侯便攜去其實珉也不知何人傳道遂妄言

章邱縣志

卷十六

外編中

三

有頌金之語或傳亦有密論列者余大惶怖不敢言亦不敢遂已盡將家中所有銅器等物欲赴外廷投進到越已移幸四明不敢留家中并寫本書寄剡後官軍收叛卒取去聞盡入故李將軍家所謂巋然獨存者無慮十去五六矣唯有書畫硯墨可六七簾更不忍置他所常在臥榻下手自開闔在會稽卜居士民鍾氏舍忽一夕穴壁負五簾去余悲慟不得活立重賞收贖後二日鄰人鍾復皓出十八軸求賞故知其盜不遠矣萬計求之遂牢不可出今知盡爲吳說運使賤價得之所謂巋然

獨存者乃十去其七八所有一二殘零不成部帙
書冊三數種平平書帖猶復愛惜如護頭目何患
也耶今日忽開此書如見故人因憶侯在東萊靜
治堂裝卷初就芸籤縹帶束十卷作一帙每日吏
散輒校勘二卷跋題一卷此二千卷有題跋者五
百二卷耳今手澤如新而墓木已拱悲夫昔蕭繹
江陵陷沒不惜國亡而毀裂書畫楊廣江都傾覆
不悲身死而復取圖書豈人性之所耆生死不能
忘歟或者天意以余菲薄不足以享此尤物耶抑
亦死者有知猶斤斤愛惜不肖留人間耶何得之

章邱縣志

卷十六

外編中

三

難而失之易也嗚呼余自少陸機作賦之二年至
過蘧瑗知非之兩歲三十四年之間憂患得失何
其多也然有有必有無有聚必有散乃理之常人
亡弓人得之又胡足道所以區區記其始終者亦
欲爲後世好古博雅者之戒云紹興二年元黜歲

壯月朔甲寅易安室題

據本書

按趙氏金石錄紹興中其妻易安居士表上之
盧見曾重刊金石錄序畧趙德夫金石錄世鮮
善本濟南謝世基嘗梓以行今其本亦不可得
見獨見有從謝氏本影鈔者并何義門手校吳

郡葉文莊公本此二本庶幾稱善其他鈔本猥
多目錄率被刪削字句訛脫不足觀余患其久
而失正也因刊此以正之德夫之室李易安婦
人之能文者相傳以爲德夫之歿易安更嫁至
有桑榆晚景駟僮下材之言貽世譏笑余以是
書所作跋語攻之而知其決無是也德夫歿時
易安年四十六矣遭時多難流離往來具有踪
跡又六年始爲是書作跋是時年已五十有二
以如是之年而猶嫁嫁而猶望其才地之美和
好之情亦如德夫昔日至大失所望而悔之又

章邱縣志

卷十六

外編中

三

不肯飲恨自悼輒謀謀然形諸簡牘此常人所
不肯爲而謂易安之明達爲之乎觀其游經喪
亂猶復愛惜一二不全卷軸如護頭目如見故
人其惓惓德夫不忘若是安有一旦忍相背之
理此子輿所謂好事者爲之或造謗如碧雲駮
之類其又可信乎余因刊此書而並爲正之母
令千載下猶蒙惡聲也

據本
書

打馬賦一卷

文獻
通考

清照自序曰專則通通則無所不達專卽精精則
無所不妙故庖丁之解牛郢人之運斤師曠之聰

依經馬流傳既久各有圖經凡例可考行移賞罰
宜有同異又宣和間人取二種馬參雜加減大約
交加僥倖古意盡矣所謂宣和馬者是已予獨愛
依經馬因取其賞罰互度每事作數語隨事附見
使兒輩圖之不獨施之博徒實足貽諸好事使千
萬世後知命辭打馬自易安居士始也時紹興四
年十一月二十有四日易安居士李清照序

見偽說郭

打馬賦

歲令云徂盧或可呼千金一擲百萬十都尊俎具陳
已行揖讓之禮主賓既醉不有博奕者乎打馬爰興

章邱縣志

卷十六

外編中

美

擣蒲遂廢實小道之上流乃深閨之雅戲齊驅驥驟
疑穆王萬里之行開列元黃類楊氏五家之隊珊珊
珮響方驚玉韉之敲落落星羅忽見連錢之碎若乃
吳江楓落燕山葉飛玉門關閉沙苑草肥臨波不渡
似惜障泥或出入用奇有類昆陽之戰或優游仗義
正如涿鹿之師或聞望久高脫復庾郎之失或聲名
素昧便同癡叔之奇亦有緩緩而歸昂昂而立鳥道
驚馳螳封安步崎嶇峻坂未遇王良跼促鹽車難逢
造父且夫邛陵云遠白雲在天心存戀豆志在著鞭
止蹄黃葉何異金錢用五十六采之間行九十一路

之內明以賞罰覈其殿最運指揮於方寸之中決勝負於幾微之外且好勝者人之常情游藝者士之末技說梅止渴稍蘇奔競之心畫餅充饑少謝騰驤之志將圖實效故臨難而不回欲報厚恩故知幾而先退或銜枚緩進已踰關塞之艱或奮勇爭先莫悟窵塹之墜皆因不知止足自貽尤悔况爲之不已事實見於正經用之以經義必合於天德故繞牀大叫五木皆盧瀝酒一呼六子盡赤平生不負遂成劍閣之師別墅未輸已破淮淝之賊今日豈無元子明時不乏安石又何必陶長沙博局之投正當師袁彥道布章邱縣志

卷十六

外編中

七

帽之擲也辭曰佛狸定見西年死貴賤紛紛尚流徙滿眼驕驕雜駉駉時危安得正致此老矣誰能志千里但願相將過淮水

見圖書集成及欣賞編

按清照自序本名打馬圖而通考載打馬賦一卷本一書也或因圖中有賦而訛耳圖載今俗刻說郛中然亦非全本

詩

咏史

兩漢本繼紹新室如贅旒所以嵇中散至死薄殷周

夏日絕句

生當作人傑死亦爲鬼雄至今思項羽不肯過江東
貴妃閣

金環半后禮鈞弋比昭陽春生柏子帳喜入萬年觴
分得知字韻

學詩三十年緘口不求知誰遣好奇士相逢說項斯
題八咏樓

千古風流八咏樓江山留與後人愁水通南國三千
里氣壓江城十四洲

春殘

春殘何事苦思鄉病裏梳頭恨最長梁燕語多終日

草邨縣志

卷十六 外編中

三

在薔薇風細一簾香

皇帝閣

日月堯天大璿璣舜歷長或聞行殿帳多是上書囊
莫具黃金簞新除玉局牀春風送庭燎不復用沉香

曉夢

曉夢隨疎鐘飄然躡雲霞因緣安期生邂逅萼綠華
秋風正無賴吹盡玉井花共看藕如船同食棗如瓜
翩翩座上客意妙語亦佳嘲辭鬪詭辨活火分新茶
雖非助帝功其樂莫可涯人生能如此何必歸故家
起來歛衣坐掩耳厭喧譁心知不可見念念猶咨嗟

感懷詩

寒窗敗几無書史公路可憐合至此青州從事孔方君終日紛紛喜生事作詩謝絕聊閉門燕寢凝香有佳思靜中我乃得至交烏有先生子虛子

上樞密韓公詩

三年夏六月天子視朝久凝旒望南雲垂衣思北狩如聞帝若曰岳牧與羣后賢寧無半千運已過陽九勿勒燕然銘勿種金城柳豈無純孝臣識此霜露悲何必羹捨肉便可車載脂土地非所惜玉帛如塵泥誰當可將命幣厚辭益卑四岳僉曰俞臣下帝所知

章邱縣志

卷十六

外編中

三

中朝第一人春官有昌黎身爲百夫特行足萬人師嘉祐與建中爲政有臯夔漢家畏王商唐室尊子儀是時已破膽將命公所宜公拜手稽首受命白玉墀曰臣敢辭難此亦何等時家人安敢謀妻子不必辭願奉天地靈願奉宗廟威徑持紫泥詔直入黃龍城北人定稽顙侍子當來迎仁君方博信狂生休請纓或取犬馬血與結天日盟

上工部尚書胡公詩

胡公清德人所難謀同德協心志安脫衣已被漢恩煖離歌不道易水寒皇天久陰后土濕雨勢未回風

勢急車聲麟麟馬蕭蕭壯士懦夫俱感泣閭閻嫠婦
亦何知瀝血投書干記室天生性氣同虎狼不虞預
備庸何傷衷甲昔時聞楚幕乘城前日記平涼葵邛
踐土非荒城勿輕談士棄儒生露布詞成馬猶倚嶠
函關出鷄未鳴巧匠何曾棄樗櫟芻蕘之言或有益
不乞隨珠與和璧只乞鄉關新信息靈光雖在應蕭
蕭草中翁仲今何若遺氓豈尚種桑麻敗將如聞保
城郭嫠家父祖生齊魯位下名高人比數當時稷下
縱談時猶記人揮汗成雨子孫南渡今幾年漂流遂
與流人伍欲將血淚寄山河去灑山東一坏土

章邱縣志

卷十六

外編中

四

涪溪中興頌碑

五十年功如電掃華清花柳咸陽草五坊供奉門雞
兒酒肉堆中不知老胡兵忽自天上來逆胡亦自奸
雄才勤政樓前走胡馬珠翠踏盡香塵埃何爲出戰
輒披靡傳致荔枝多馬死堯功舜德本如天安用區
區記文字著碑銘德真陋哉乃令神鬼磨山崖子儀
光弼不自猜天心悔禍人心開夏爲殷鑒當深戒簡
策汗清今俱在君不見當時張說最多機雖生已被
姚崇賣又不見驚人廢興傳天寶中興碑上今生草
不知負國有奸雄但說成功尊國老

誰令妃子天生來，號秦韓國皆天才。苑中羯鼓玉方響，春風不敢生塵埃。姓名誰復知安史，健兒猛將安眠死。去天尺五抱甕峯，峯頭鑿出開元字。時移勢去真可哀，奸人心醜深如崖。西蜀萬里尚能反，南內一閉何時開。可憐孝德如天大，反使將軍稱好在。嗚呼奴輩胡不能道輔國用事張后尊，祇能道春齊長安作芹買。

漱玉詞

如夢令 酒興

常記溪亭日暮，沉醉不知歸路。興盡晚回舟，誤入藕花深處。爭渡爭渡，驚起一行鷗鷺。

章邱縣志

卷十六 外編中

望

前調

昨夜雨疎風驟，濃睡不消殘酒。試問捲簾人，却道海棠依舊。知否知否，應是綠肥紅瘦。

生查子

年年玉鏡臺，梅蕊宮妝困。今歲不歸來，怕見江南信。酒從別後疎，淚向愁中盡。遙想楚雲深，人遠天涯近。

點絳脣 閨思

蹴罷秋千起來慵，整纖纖手。露濃花瘦，薄汗輕衣透。

見有人來鞞刻金釵溜和羞走倚門回首却把青
梅鬢

前調

寂寞深閨柔腸一寸愁千縷惜春春去幾點催花雨
倚遍闌干祇是無情緒人何處連天芳樹望斷歸
來路

浣溪沙 春暮

淡蕩春光寒食天玉爐沉水裊殘烟夢回山枕隱花
鈿 海燕未來人鬪草江梅已過柳生絲黃昏疎雨
濕秋千

章邱縣志

卷十六 外編中

三

前調

繡幕芙蓉一笑開斜偎寶鴨襯香腮眼波才動被人
猜 一面風情深有韻半牋嬌恨寄幽懷月移花影
約重來

前調

樓上晴天碧四垂樓前芳草接天涯傷心莫上最高
梯 新筍已成堂下竹落花都入燕巢泥忍聽林表
杜鵑啼 傷心詞綜
作勸君

前調

鬢子傷春懶更梳晚風庭院落梅初淡雲來往月疎

疎 玉鴨薰爐閒瑞腦朱櫻斗帳掩流蘇通犀還解
辟寒無

前調

小院閒窗春色深重簾未捲影沉沉倚樓無語理瑤
琴 遠岫出雲催薄暮細風吹雨弄輕陰梨花欲謝
恐難禁

采桑子

晚來一陣風兼雨洗盡炎光理罷笙簧却對菱花淡
淡妝 絳綃縷薄冰肌瑩雪膩酥香笑語檀郎今夜
紗幮枕簟涼

章邱縣志

卷十六

外編中

四

清平樂

年年雪裏常插梅花醉按盡梅花無好意贏得滿衣
清淚 今年海角天涯蕭蕭兩鬢生華看取晚來風
勢故應難看梅花

南唐浣溪紗

病起蕭蕭兩鬢華卧看殘月上窗紗豆蔻連梢煎熱
水莫分茶 枕上詩篇閒處好門前風景雨來佳終
日向人多蘊藉木樨花

添字采桑子

芭蕉

窗前誰種芭蕉樹陰滿中庭陰滿中庭葉葉心心舒

卷有餘情 傷心枕上三更雨點滴淒清點滴淒清
愁損離人不慣起來聽

武陵春 春晚

風住塵香花已盡 日晚倦梳頭 物是人非事事休 欲
語淚先流 聞說雙溪春尚好也 擬泛輕舟 只恐雙
溪舴艋舟 載不動許多愁

醉花陰

詞綜作九日

薄霧濃雲愁永晝 瑞腦銷金獸 佳節又重陽 玉枕紗
幮 半夜涼初透 東籬把酒黃昏後 有暗香盈袖 莫
道不銷魂 簾捲西風人似黃花瘦 上銷字詞
選作噴

章邱縣志

卷十六

外編中

罌

南歌子

天上星河轉 人間翠幕垂 涼生枕簟淚痕滋 起解羅
衣 聊問夜何其 翠貼蓮蓬小金銷 藕葉稀 舊時天
氣 舊時衣 只有情懷不似舊家時

怨王孫

春暮

夢斷漏悄愁濃酒惱 寶枕生寒 翠屏向曉 門外誰掃
殘紅 夜來風 玉簫聲斷人何處 春又去 忍把歸期
負 此情此恨 此際擬託行雲問東君

前調

詞綜作春暮

帝里春晚 重門深院 草綠堦前 暮天鴈斷 樓上遠信

誰傳恨絲絲 多情自是多沾惹難拚捨又是寒食也秋千巷陌人靜皎月初斜浸梨花

浪淘沙

一名賣花聲

素約小鬢身不耐傷春疎梅影下晚妝新裊裊婷婷何樣似一縷輕雲 歌巧動朱唇字字嬌嗔桃花深徑一通津悵望瑤臺清夜月還照歸輪

前調

簾外五更風吹夢無踪畫樓重上與誰同記得玉釵斜撥火寶篆成空 回首紫金峯雨濶雲濃一江春

浪醉醒中留得羅襟前日淚彈與征鴻

雲詞綜作烟

章邱縣志

卷十六

外編中

巽

鷓鴣天

盡日蕭蕭上瑣窗梧桐應恨夜來霜酒闌更喜團茶苦夢斷偏宜瑞腦香 秋已盡日猶長仲宣懷遠更淒涼不如隨分尊前醉莫負東籬菊蕊黃

前調

詠桂

暗淡輕黃體性柔情疎跡遠只香留何須淺碧深紅色自是花中第一流 梅定妬菊應羞詩書閑處冠中秋騷人可煞無情思何事當年不見收

怨王孫

賞荷

湖上風來波浩渺秋已暮紅稀香少水光山色與人

親說不盡無窮好 蓮子已成荷葉老清露洗蘋花
汀草眠沙鷗鷺不回頭應也恨人歸早

玉樓春 紅梅

紅酥肯放瓊瑤碎探著南枝開徧未不知蘊藉幾多
時但見包藏無限意 道人憔悴春窗底閒拍闌干
愁不倚要來小看便來休未必明朝風不起

小重山

春到長門春草青江梅些子破未開勻碧雲籠碾玉
成塵留晚夢驚破一甌雲 花影壓重門疎簾鋪淡
月好黃昏二年三度負東君歸來也著意過今春

章邱縣志

卷十六 外編中

吳

一剪梅 別愁

紅藕香殘玉簟秋輕解羅裳獨上蘭舟雲中誰寄錦
書來鴈字回時月滿樓 花自飄零水自流一種相
思兩處閒愁此情無計可消除纔下眉頭却上心頭

詞綜月滿下
多一西字

臨江仙

庭院深深深幾許雲窗霧閣春遲爲誰憔悴瘦芳姿
夜來清夢好應是發南枝 玉瘦檀輕無限恨南樓
羌管休吹濃香開盡有誰知暖風遲日也別到杏花
時

前調

庭院深深深深幾許雲窗霧閣常扃柳稍梅萼漸分明
春歸秣陵樹人客建安城感月吟風多少事如今
老去無成誰憐憔悴更凋零燈花空結蕊離別共傷
情

蝶戀花

離情

淚搵征衣脂粉暖四疊陽關聽了千千遍人到山長
水又斷蕭蕭微雨聞孤館惜別傷離方寸亂忘了
臨行酒盞深和淺若有音書憑過鴈東萊不似蓬萊
遠

章邱縣志

卷十六

外編中

七

前調

永夜厭厭歡意少空夢長安認取長安道爲報今年
春色好花光月影宜相照隨意杯盤雖草草酒美
梅酸恰稱人懷抱醉莫插花花莫笑可憐春似人將
老

前調

暖雨和風初破凍柳眼梅腮已覺春心動酒意詩情
誰與共淚融殘粉花鈿重乍試夾衣金縷縫山枕
欹斜枕損釵頭鳳獨抱濃愁無好夢夜闌猶剪燈花
弄

青玉案

征鞍不見邯鄲路莫便匆匆歸去秋正蕭條何以度
明窗小酌暗燈清話最好留連處相逢各自傷遲
暮獨把新詞誦奇句鹽絮家風人所許如今憔悴但
餘雙淚一似黃梅雨

御街行

藤牀紙帳朝眠起說不盡無佳思沈香烟斷玉爐寒
伴我情懷如水笛聲三弄梅心驚破多少春情意
小風疎雨瀟瀟地又催下千行淚吹簫人去玉樓空
腸斷與誰同倚一枝折得人間天上沒箇人堪寄

章邱縣志

卷十六 外編中

晁

鳳凰臺上憶吹簫

閨情

香冷金猊被翻紅浪起來慵自梳頭任寶匳塵滿日
上簾鈎生怕離懷別苦多少事欲說還休新來瘦非
干酒病不是悲秋休休這回去也千萬徧陽關也
則難留念武陵人遠烟鎖秦樓惟有樓前流水應念
我終日凝眸凝眸處從今又添一段新愁

酒病詞綜
作病酒

滿庭芳

殘梅

小閣藏春閒窗鎖畫畫堂無限深幽篆香燒盡印影
下簾鈎手種江梅漸好又何必臨水登樓無人剗
藂恰似何遜在揚州從來知韻勝難禁雨藉不耐

風揉更誰家橫笛吹動濃愁莫恨香消玉減須信道
掃跡情留難言處良宵淡月疎影上風流

聲聲慢

秋情

尋尋覓覓冷冷清清悽悽慘慘戚戚乍暖還寒時候
最難將息三杯兩盞淡酒怎敵他晚來風急鴈過也
正傷心却是舊時相識 滿地黃花堆積憔悴損如
今有誰堪摘守著窗兒獨自怎生得黑梧桐更兼細
雨到黃昏點點滴滴這次第怎一箇愁字了得
晚詞
綜作

慶清朝慢

章邱縣志

卷十六

外編中

辛

禁幄低張雕欄巧護就中獨占殘春容華淡汙綽約
俱見天真待得羣花過後一番風露曉妝新妖嬈態
妒風笑月長殢東君 東城邊南陌上正日烘池館
競走香輪綺筵散目誰人可繼芳塵更好明光宮裏
幾枝先向日邊勻金尊倒拚了畫燭不管黃昏
目疑
作日

念奴嬌

一名壺
中天慢

蕭條庭院又斜風細雨重門深閉寵柳嬌花寒食近
種種惱人天氣險韻詩成扶頭酒醒別是閒滋味征
鴻過盡萬千心事難寄 樓上幾日春寒簾垂四面
玉闌干慵倚被冷香消新夢覺不許愁人不起清露

晨流新桐初引多少遊春意日高烟斂更看今日晴

未深詞綜
作須

多麗蘭苑

小樓寒夜長簾幙低垂恨蕭蕭無情風雨夜來揉損
瓊肌也不似貴妃醉臉也不似孫壽低眉韓令偷香
徐娘傅粉莫將比擬未新奇細看取屈平陶令風韻
正相宜微風起清芬蘊藉不減茶蘼漸秋闌雪清
玉瘦向人無限依依似愁凝漢臯解珮似淚灑紈扇
題詩明月清風濃烟暗雨天教憔悴瘦芳姿縱愛惜
不知從此留得幾多時人情好何須更憶澤畔東籬

章邱縣志

卷十六外編中

莖

詞話附

朱海菴曰本朝婦人能詞者惟李易安魏夫人二人
而已黃玉林曰李易安魏夫人使在衣冠之列當與
秦七黃九爭雄不徒擅名閨閣也古今
詞話

張正夫云李易安元宵永遇樂云落日鎔金暮雲合
璧已自工緻至於染柳烟輕吹梅笛怨春意知幾許
氣象更好後叠云於今憔悴風鬟霜鬢怕是夜間出
去皆以尋常語度入音律愈平淡愈精巧其聲聲慢
云尋尋覓覓冷冷清清悽悽慘慘戚戚乃公孫大娘
舞劍手本朝非無能詞之士未曾有一下十四叠字

者後疊又云到黃昏點點滴滴又使疊字俱無斧鑿痕守著窗兒獨自怎生得黑黑字不許第二人押婦人有此奇筆真閒氣也怕是夜閒出去詞綜作怕向花閒重去

黃叔暘云前輩稱易安綠肥紅瘦爲佳句子謂寵柳嬌花語亦甚奇俊前此未有能道之者李易安以重陽醉花陰詞寄其夫趙明誠明誠歎絕苦思求勝之廢寢食者三日得五十闕雜易安詞中以示友人陸德夫陸玩之再三謂只三句絕佳莫道不消魂簾捲西風人似黃花瘦正易安作也娜嬛記

李清照有清露晨流新桐初引之句用世說入妙詞品

章邱縣志

卷十六 外編中

五

凡爲詩文貴有節制卽詞曲亦然正調至秦少游李易安爲極致若柳耆卿則靡矣變調至東坡爲極致辛稼軒豪於東坡而不免稍過若劉改之則惡道矣學者不可以不辨分廿餘話

黃叔暘云漱玉集三卷馬端臨云別本分五卷今一卷攷諸宋元雜記大率合詩詞雜著爲漱玉集則釐全集爲三卷無疑矣第國朝博雅如用脩先生尚慨未見其全湮沒不幾久耶庚午仲秋余從選卿覓得宋詞廿餘種乃洪武三年抄本訂正已閱數名家中

有漱玉斷腸二冊雖卷帙無多參諸花菴草堂彤管

諸書已浮其半真鴻寶也急合梓之以公同好末載金石錄後序略見易安居士文妙非止雄於一代才媛直洗南渡後諸儒腐氣上返魏晉矣尾附遺事幾則亦罕傳者湖南毛晉識

張子韶對策有桂子飄香之語趙明誠妻李氏嘲之曰露花倒影柳三變桂子飄香張九成

趙明誠幼時其父將爲擇婦明誠晝夢誦一書覺來惟憶三句云言與司合安上已脫芝芙草拔以告其父其父爲解曰言與司合是詞字安上已脫是女字芝芙草拔是之夫二字非謂汝爲詞女之夫乎後李章邱縣志

卷十六 外編中

五

翁以女女之卽易安也果有文章易安結褵未久明誠卽負笈遠遊易安殊不忍別覓錦帕書一剪梅詞以送之

四朝詩集閩秀韓玉父秦人家於杭李易安教以詩

南宋

雜事

太平清話莫廷韓云向曾置李易安墨竹一幅 同上

貴耳錄清菴鮑氏秀齋方氏淳熙間二婦人文筆可繼易安之後

宋學士濂題易安所書琵琶行詩永嘉陳侯好奇士夢裏謬爲兒女語花顏國色草上塵朽骨何敢汗唇

齒生男當如魯男子生女當如夏侯女千年穢跡吾
欲洗安得潯陽半江水

清照自號易安居士其舅挺之相徽宗清照獻詩有
云炙手可熱心可寒挺之排元祐黨人甚力格非以
黨籍罷清照上詩救格非有云何況人間父子情識
者哀之

詩說雋永云李在趙氏時建炎初從秘閣守建康作
詩云南來尚怯吳江冷北狩應悲易水寒又云南渡
衣冠少王導北來消息欠劉琨又香祖筆記云西樵
昔撰然脂集只得其詩二句云少陵亦是可憐人更
章邱縣志

卷十六

外編中

畜

待明年試春草

四六談麈云祭文唐人多用四六韓退之亦然故李
易安祭湖州文云白日正中嘆龐公之機捷堅城自
墮憐杞婦之悲深

按周輝清波雜誌云趙明誠待制妻易安李夫人嘗
和張文潛浯溪中興頌碑長篇二以婦人而廁衆作
非思有深致者能之乎頃見易安族人言明誠在建
康日易安每值天大雪卽頂笠披蓑循城遠覽以尋
詩得句必邀其夫賡和明誠每苦之也

李易安賀人學生啓中有云無午未二時之分有伯

仲兩楷之倡旣繫臂而繫足實難弟而難兄玉刻雙
璋錦挑對襟註曰任文二子孿生德卿生於午道卿
生於未張伯楷仲楷兄弟形狀無二白汲兄弟母不
能辨以五色綵繩一繫於臂一繫於足

粹文

李易安云樂府聲詩並著最盛於唐開元天寶間有
李八郎者能歌擅天下時新及第進士開宴曲江榜
中一名士先召李使易服隱名姓衣冠故傲精神慘
沮與同之宴所曰表弟願與坐末衆皆不顧及酒行
樂作歌者進時曹元謙念爲冠歌罷衆皆咨嗟稱賞
名士忽指李曰請表弟歌衆皆哂或有怒者及轉喉
章邱縣志

卷十六

外編中

五

發聲歌一曲衆皆泣下羅拜曰此李八郎也自後鄭
衛之聲日熾流靡之變日煩已有菩薩蠻春光好莎
雞子更漏子浣溪沙夢江南漁父等詞不可徧舉五
代干戈四海瓜分豆剖斯文道熄獨江南李氏君臣
尚文雅故有小樓吹徹玉聲寒吹皺一池春水之詞
語雖甚奇所謂亡國之音哀以思也迨本朝禮樂文
武大備又涵養百餘年始有柳屯田永者變舊聲作
新聲出樂章集大得聲稱於世雖協音律而詞語塵
下又有張子野宋子京兄弟沈唐元絳晁次鷹輩繼
出雖時時有妙語而破碎何足名家至晏元獻歐陽

永叔蘇子瞻學際天人作為小歌詞直如酌蠶水於大海然皆句讀不葺之詩爾又往往不協音律者何耶蓋詩文分平側而歌調分五音又分五聲又分六律又分清濁輕重且如近世所謂聲聲慢雨中花喜遷鶯既押平聲韻又押入聲韻玉樓春本押平聲韻又押上去聲又押入聲本押仄聲韻如押上聲則協如押入聲則不可歌矣王介甫曾子固文章似西漢若作一小歌詞則人必絕倒不可讀也乃知別是一家知之者少後晏叔原賀方回秦少游黃魯直出始能知之又晏苦無鋪敘賀苦少典重秦即專主情致而少故章邱縣志

卷十六

外編中

奚

實譬如貧家美女雖極妍麗丰逸而終乏富貴態黃即尚故實而多疵病譬如良玉有瑕鑽自減半矣茗溪

漁隱叢話

吾里李文叔元祐文學也其女清照詞家大宗宋南渡後其藝文散軼北方罕有傳者即有之率皆僅志其名目然即文叔洛陽名園記一卷與清照數詩及雜詞數闋已可見其梗概云康星

壽識

鬻山賦

景尚新邑人

繫協洽之入歲選嘉月之已周喟煩囂之類累忽遐

溜澆復沄潛潤冰滅派激洌澎洶倒長防而百折潢
滴潔其無聲倏焉一決百畛皆盈圃滲淫其長雨禾
穉籟而再榮客啜抱甕之拙僧微引竹之爭至若巒
蹄水翼洞蝠澤蝶山精號嘯野怪猙獰仙峰揭嶮其
東拱鳳嶺翕霍而西迎泊水沖融以北遶胡山參臯
其南平健鷓攫巔而勵翮蒼駮破麓以遙征青要娥
媼而嬖嬿綠華游駕以窺窺鄭子研義以遞漢伏生
抱典而逃嬴去來吹笙之子晉往旋飛錫之應貞壺
嶺方其可仰神瀛洩而彌清紛千奇而百異浩茫昧
而難名主人于是周歷坳臯徘徊茵草徐步長林迴

瞻遠道濯纓醴泉承衿澗藻乍臆悚以拒樛將趨禋
乎范老始憚遜以韜虔旋趨本以奔造庖命丁牙枕
矢冥昊酌醒持腳陳罇薦祭景山水之高長恠怛怛
而草佬疇憂時之微志兮迺先生之邁時介余生之
後辰兮心慄候而增悲恁先達之懿則兮曰後天下
而樂之允鴻勳其昭灼兮復遺編而恂知耿余心之
怍慙兮趨逸跡而追馳馨黍稷以羞靈兮羗百跽以
陳詞苟先生之鑒余兮神陟降其來斯于時文峯歛
碧書帶卷英光寒金窟翠冷齏莖文雉翔風而出沒
宏鐘觸石以鏗鉤洋洋格享翼翼亨明依微綺疏閃

御製

麗日和風被萬方

詩兵部左侍郎焦毓瑞與宴應制

康熙壬戌上元 賜宴乾清宮 詔賦柏梁體

爍丹楹天空霞落氣爽風輕皇皇既舉欣欣報禎迺
徹餘惠招益友潭盤資醕卮酒飲饅醑酣斃躡陵阜
爰遵舊猷懽歌先後歌曰瞻彼恒山雲泱泱兮濫泉
波滴流湯湯兮驤棟差我延曦光兮叢薄續紛鳥迴
翔兮坦素飲遊湛憂忘兮飫粥塵金聊希芳兮

卿雲爛熳彌紫閭 內閣大學士 臣勒德洪 一堂喜起歌明

良 內閣大學士 臣明珠 止戈化洽民物昌 內閣大學士 臣李蔚 蓼蕭

章邱縣志 卷十六 外編中 堯

燕譽

聖恩長 內閣大學士 臣馮溥 天心昭格時雨暘 吏部尚書 臣黃機 豐亨

有兆祝千箱 戶部尚書 臣梁清標 禮樂文章仰

聖皇 禮部尚書 臣吳正治

廟謨指授靖八荒 兵部尚書 臣宋德宜 春回 丹詔罷桁楊 刑部

尚書 臣魏象樞 河清海宴禹蹟彰 工部尚書 臣朱之珩 百度胥飭

紀綱張 都察院左都御史 臣徐元文 千官濟濟盈巖廊 吏部 左侍郎

郎 臣張士甄 天工無曠勤贊襄 吏部右侍郎 臣楊永寧 有年歌

協臣所望 戶部左侍郎 臣李天馥 共期紅朽答殊常 戶部右侍郎

郎 臣李仙根 轉漕億萬充天倉 戶部倉場侍郎 臣馬汝驥 邦禮叨

贊慚趨蹌

禮部左侍郎 臣楊正中

職司寅清佐垂裳

禮部右侍郎

郎臣富

天河洗甲通蠻鄉

兵部左侍郎 臣焦毓瑞

皇威四暢咸來王

兵部右侍郎 臣陳一炳

砥承欽恤和氣翔

刑部

左侍郎 臣杜臻

刑措不用民壽康

刑部右侍郎 臣葉方藹

八材庀

化師及斯

工部左侍郎 臣趙璟

右平左城開明堂

工部右侍郎 臣

金 仰窺神策驅天狼

內閣學士 臣李光地

膏以大澤人胥

慶 內閣學士 臣張玉書

帝庸作歌追虞唐

翰林院掌院學士 臣陳廷敬

身依雲漢賡

天章

翰林院學士 臣張英

恪秉訓厲敦羔羊

左副都御史 臣宋文運

奉宣

仁風之無疆

巡撫江寧左副都御史 臣徐國柱

九閭詆蕩瞻龍

章邛縣志

卷十六

外編中

卒

光 通政使司通政使 臣王盛唐

斗杓高掩貫索芒

大理寺卿 臣張雲翼

圖列養正親羹牆

詹事府詹事 臣沈荃

黃鐘大鏞諧禎祥

太常寺卿 臣崔澄

郊衢擊壤歡豐穰

順天府府尹 臣熊一瀟 大官

珍膳羅酒漿

光祿寺卿 臣馬世濟

調閑六御騰康莊

太僕寺卿

臣張 可前 忝預風紀凜清霜

僉都御史 臣張吉午

出入玉珮聲

鏘鏘

左通政 臣崔官 納言維允尚職詳

右通政 臣吳典 褒忠勵

節感

右通政 臣陳汝器 賜觴

園扉闐寂春草芳

大理寺少

卿臣榮 國祚

拜手好生頌禹湯

少卿 臣徐旭齡

前星令望欽

頤印 少詹事 臣王澤宏

終始念典用斯臧

少詹事 臣崔蔚林 言

模行範輝縹緗

侍讀學士 臣蔣宏道 猗歟

至德日就將侍讀學士叨塵侍從恩莫量侍讀學士

靖共夙夜無怠違侍講學士梧桐生矣于高岡臣朱之佐

侍講學士臣孫在豐細書東觀翰墨香侍講學士三德六臣盧琦

行為士坊國子監祭酒官官備位滋棟惶右春坊右

庶子臣六經義叶如笙簧侍讀臣奎文煥若森

琳瑯侍讀臣朝朝橐筆侍

御牀侍讀臣紀載

聖治金匱藏侍讀臣頻年宣室虛對揚侍讀臣

宸篇揆藻燭昊蒼侍讀臣承華毓德成圭璋左諭德

青宮琪樹棲鸞鳳右諭德金輿導從驟雲驤司經

京邸縣志 卷十六 外編中 空

局洗馬臣累憇流影耀璧璫左參議臣仁波溟

渤同濺汪右參議臣鸞旂乘春零露灑右參議

爰賡天保矢勿忘右參議八表同軌來梯航大

寺寺丞臣雲門磬管聲嚶嚶右中允泰交天

闕開春陽左中允惟睿作聖金玉相右中允

極珥筆何幸日月旁左贊善瑞逾寶鼎兼芝

房左贊善堯樽夜醉星低昂右贊善在廷

悅豫和宮商右贊善濫典樂正董上庠司業

芳治登三五床聲颺修撰容謨典誥同洋洋

編修臣記神聖功臣職當編修琅函瑞版書

終軍知之賜絹百匹爾雅注

平陵東翟義門人所作也王莽殺義義門人作歌以

怨之崔豹古今注

樂府解題曰義丞相方進之少子字文仲為東郡太

守以王莽方篡漢舉兵誅之不克見害門人作歌以

怨之也平陵東松柏桐不知何人劫義公劫義公在

高唐下交錢百萬兩走馬兩走馬亦誠難顧見追吏

心中惻心中惻血出漉歸告我家賣黃犢郭茂倩樂府詩集

唐太宗賜房元齡黃銀帶曰世傳黃銀鬼神畏之唐

本草注有黃銀本經不載俗云為器辟惡朱翌云別

章邱縣志 卷十六 外編下 三

自一種銀非金也居易錄

陳子昂送著作佐郎崔融等從梁王東征序歲七月

軍出國門時比部郎中唐奉一考功員外郎李迥秀

著作佐郎崔融並參帷幕之賓掌書記之任見文苑英華

崔融瓦松賦序曰崇文館瓦松者產於屋霑之下謂

之木也訪山客而未詳謂之草也驗農皇而罕記賦

云煌煌特秀狀金芝之之產雷歷歷虛懸若星榆之種

天葩條郁毓根柢連卷間紫苔而裛露凌碧瓦而含

烟又曰慚魏宮之烏悲慙漢殿之紅蓮崔公學博無

不該悉豈不知瓦松已有著作乎酉陽雜俎

久覲元年改控鶴府爲奉宸府張易之爲奉宸令引
詞人爲供奉佞者奏云昌宗王子晉後身令被羽衣
吹簫乘木鶴奏樂於庭融賦詩爲絕唱有昔遇浮邱
伯今同丁令威中郎才貌是藏史姓名非之句後與
宰相蘇味道相誚云某詩所以不及相公無銀花合
也蘇有詩云火樹銀花合味道云子詩雖無銀花合
還有金銅丁取令威之句也

唐書
紀事

員半千隴右途中遭非語詩云趙有兩毛遂魯聞二
曾參慈母猶且感况在行路心冠冕無醜士賄賂成
知己名利我所無清濁誰見理弊服空廷春緩帶不
着身出遊非懷璧何憂乎忌人正須自保愛振衣出

章邱縣志

卷十六 外編下

齋

世塵

唐詩
紀事

晁无咎有竹堂記濟南李文叔爲太學正得屋於經
衢之西輪直於官而居之治其南軒地植竹砌旁而
名其堂曰有竹榜諸棟間又爲之記於壁率午歸自
太學則坐堂中埽地置筆研呻吟策牘爲文章日數
十篇不休如繭抽緒如山雲蒸如泉出地流如春至
草木發須臾盈卷軸門窗几案婢僕犬馬目前之物
有一可指無不論說形容彊誦而故評之以致其欣
悅而於竹尤數數也顧其地狹而卑天雨榛蕪蜘蛛

之織河柳兔葵之所交橫而蒙翳人不知其竹也有
過者文叔必顧堂下而語之讀壁間記仰棟而指其
勝曰吾固詔客矣客蹶然而笑曰今夫渭川之千畝
淇園之林於南山之造天而蔽日者其大若杯若盃
若桐梓之軀其膠繚岫岩之上而臨百仞之淵不特
出屋檐而摩牆堵也莫春者春雷隱山萬筍奮角如
犀兕作籜解而出碧一日百尺彌望不可以極於時
刀斧之取材者度徑圍而得之大小齊一西轉巴峽
南引江漢浮渭而亂河困束籜屬而下者爲筒爲竿
爲屋椽樅苗千丈之竿徧國之藩籬是賴與竅而比

章邱縣志

卷十六

外編下

五

夫律呂以悲哀娛耳者管聲滿天地也是其旁之人
室廬竹也用器竹也樵而薪者竹也以貿米鹽而出
之其鄰境者竹也夫此人豈知竹之愛翛然而喜諄
諄然語人而以夸之曰吾居有竹也哉文叔亦蹶然
而笑曰不然夫物安知其貴賤之所常在玉之美而
藍田以抵鵲沈爲美木而交趾以爲槃食莩白鵬錦
雉山中以醢腊而貴人以百金致茗以爲粥而胡人
以爲佩夫物固有以多爲賤而以少爲貴者今夫王
城之廣大九塗四達三門二百坊之棊置上自王
侯至於百姓庶民官接而垣比車馬之所騰藉人氣

之所蒸清囂塵百里欲求尺寸之地以休佚而莫之
致而貧者置園無所况於其他哉然則環堵不容丈
而有竹如吾堂者不知能幾人也則余所以揭之於
棟而名之書諸壁而記之翛然而喜諄諄然語客而
以夸之不亦可哉且竹之美昔人以比德松柏在冬
夏青青君子之所獨也以夫少猶貴之使余得見夫
渭川淇園與南山之蒼蔚者而遊其間雖多固不可
賤也夫多猶不可賤而又况其少哉客曰唯雖然吾
聞昔王子猷好竹嘗曰安可一日無此君聞吳中士
大夫有佳竹欲觀之徑出坐輿造竹下諷嘯良久主
堂上不去曰竹固招我元祐四年五月二十八日穎

章邱縣志

卷十六

外編下

奕

川晁補之无咎記

雞肋集

禮部移竹詩次韻李員外文叔東南之美者見伐以
直幹豈如此君疎猶作此郎玩此郎乃在此無乃材
亦散平生吉甫誦意鄙枚叔亂坐狂得此冷對竹頭
幘岸尚思殺青書充宇白虎觀恐此愧子猷還成倚

楹歎

文叔有志史事

同上

與李文叔夜談詩中庭老柏霜雪裏北風烈烈偏激

耳誦詩夜半舌入喉飲我樽中滌醺弄升堂辭翰愧
非有何異還家數其齒文章萬古猶一魚乙丙誰能
辨腸尾更慙頗似曾嵇康欲語常遭士瑤梃廣陵八
月未足言曾使醞醲恣然起安得譚如子枚子同上

張耒答李文叔爲兄立謚書賢兄之懿人實聞之其
不至公卿而死不得使有司顯議而公謚之其爲不
幸無可言者但其得美之實苟不可泯滅自應傳世
而今乃兄弟生徒爲之易名則夫薄俗之喜以嫌處
物者久矣孰肯爲弟不私其兄哉旣嫌於私則聞者
不信不信則并與其實而敗之矣所以愛之正所以
章邱縣志

卷十六 外編下

奎

害之也願更審度

顧宸宋
文選

墨莊云李格非文叔作歷下水記敘述甚詳文體有
法惜不與洛陽名園記並傳

香祖
筆記

趙明誠守淄清照積書數十萬卷金人南下清照倉
皇渡江書漸散失惟漱玉集行世王季木齊音云京
朝名跡此中稀剽水黥山感異時惟有女郎風雅在
又隨兵舫泣江離

濟南
志

田告字象宜篤學有文少學詩于陳希夷東游過濮
谷于王元之會河決著禹元經三卷已而得水樹于
濟南明水將隱居焉貽書徐常侍鉉鉉答曰負鼎叩

角顧廬築岩各由其時不失其道在我而已何常之
有遂決高蹈筮易遇睽因自號睽叟從學者常數百
人淳化中韓丕言于天子召赴闕詔書及門而卒皇
祐中濟南翟書哀其文四十八篇析爲三卷又次其
出處作睽叟別傳今明水在章邱城南土鼓縣故城
西亭山縣東北曰淨明泉在百脉泉西北卽繡江之
源也齊乘云朗公谷諸水東西伏流西發趵突東發
百脉所謂金霏碧渟韻琴筑而味肪體者也此吾鄉
高逸第一流昔撰古懽錄遺之夏日雨過讀澠水燕
談得告事因略述水經注元和郡縣志齊乘而著于

章邱縣志

卷十六

外編下

矣

篇

香祖
筆記

虞集題張希孟凝雲石詩海石不盈握隕然如委雲
危岑集遠思虛竇棲微熏天高太華斷日出香爐分
几研襲清潤文章互網緼潛雷起神谷震驚天上聞
亟視恐無極化爲九龍文四朝
詩選
人海記崇文門東南有淨度寺按元張中丞養浩作
其子雁奴壙銘有云權厝文明門外淨度寺之南原
寺蓋元時有之矣朱彝尊曰
下舊聞

宋文憲公濂集有題長白山居圖詩云滿地雲林稱
隱居燕泥汚我讀香五更
風急鳥聲散時有隔花

來賣魚子撰長白山錄未及載入因錄于此然不知
爲何人作也居易錄

襲勗字克懋一字懋卿章邛人少貧牧豕年三十始
補諸生時邑中李太常伯華袁西野崇冕方尚金元詞

曲勗謂傷雅道獨與濟南殷正甫李于麟許殿卿爲
古文辭相友善年六十以歲貢仕江都縣訓導遷威
寧教諭開平衛教授歸五年卒所著有懋卿集太極
圖解性命辨劉尚書白川稱爲朱元晦功臣王伯安
諍友云勗父彪嘗以輸租詣京師見遺錢百緡於道
輦載而馳及前遺錢者付之徑去華鰲字空塵亦章

章邛縣志 卷十六 外編下 究

邛人御史珩之孫邑諸生妙於繪事落筆輒題其上
曰空塵詩畫人丐之畫輒瞪目不應當其意得迥出
筆墨蹊徑之外詩亦如之五言尤超詣題王仁甫小
築云大隱不在山出處乃適意送呂仲甫山人云秋
老留紅葉風輕轉白蘋宿惠上人院云愛此疎林月
兼之一磬清孤坐云雨霽聞啼鳥風停數落花過楊
九山川上居云鑪頭留宿火花徑閉秋雲人以擬浩
然微雲疎雨之句鰲亦滄溟友予少見其集今無從
購矣鰲姓字亦見楊升菴集勗有寄滄溟絕句云瓜
田十畝濟城東雲外青山小苑通流水桃花迷處所

幾家春樹暮烟中
驚睡起自述云槐午睡方熟息肩者稚子老妻撼繩牀飯熟呼不起不能工磬折髮亂無人理我懶我自知不要旁人喜

池筆
偶談

袁崇冕字西野進士弼之子兄公冕弟軒冕皆用科第起家崇冕獨以布衣終工金元詞曲所著春遊秋懷諸曲足參康王之座與李中麓唱酬王羨陂曰雅俗相兼颯颯有餘音楊方城曰神聖工巧元人之儔中麓曰金石之音元黃之色其爲名流擊賞如此嘗有客以黃鶯學畫眉詞謁李太常坐客皆言佳西野後至太常曰翁素負知音試擇佳句幾何予已有定

章邱縣志

卷十六

外編下

七

評西野曰畢應聲曰止起五字是詞家語餘無足取太常展手示之云止未老已投閑一句客皆大笑歎服同時有高應玘者中麓弟子亦工詞曲以貢仕爲元城丞見知王元美魏懋權所著有醉鄉歸田諸稿其北門鎖鑰雜劇論者以爲詞人之雄又有張國籌者以貢仕爲行唐知縣善金元詞曲所著有脫穎茅廬章臺柳韋蘇州申包胥等劇在袁西野李中麓伯仲間皆章邱人與太常同時又有張自慎者字敬叔商河人遊中麓之門著金元樂府三十餘種太原萬伯修曰北曲一派海內索解人不得眼中獨見張就

山耳就山自慎別號也

徐宗伯學謨冰廳劄記云昆陵唐荆川順之始以官僚言事削籍海內有景星慶雲之望繼倭亂江南趙文華薦之朝起南兵部郎轉北至京朝士爭往候之荆川闔門謝客客至常不得見及報謝自九卿外庶僚惟翰林科道吏部而已是時分宜當國久勢傾中外欲借荆川爲名高日令其子置酒致款洽荆川儒者一見隆重遂爲莫逆以謂可附之行道不知入其牢籠也巡邊之役分宜享之西苑直房飲以薏苡酒荆川以爲佳分宜曰酒故薊遼王總督餽予酒則一章邛縣志

卷十六

外編下

三

年佳一年官却一年不佳一年荆川領之至薊欲馳總督甬道王公自以帶兵部堂銜難之荆川殊怏怏還朝先以巡邊疏稿託白儀制啟常呈世蕃內參王公至數百言世蕃覽之大驚曰此疏入王公械逮矣乃以筆盡刪去止留一卒不練誠如聖論云四句乃得秋後處治之旨朝論以薏苡酒之語謂荆川爲嚴氏報効此其故不可知矣如宗伯所言王司馬思質之獄發指雖由相嵩荆川實爲搏擊何殊文華之媒藥張半洲耶李中麓開先荆川至交也常遺之書曰此一起官頗紛物議出非其時託非其人將舉平日所

守而盡喪之矣又云或佛胼欲往之意也豈知其終是不可哉蓋良友之言如此

居易錄

李中麓太常云如楊慈湖之易林之奇之書詩則王氏總聞春秋則木訥經筵及魏湜之禮記集說多有高出朱註之上者此外能發明經旨者抑又不止四五十家宋刻已古鈔冊漸訛再過百年俱失傳矣必須題請之後有京板以及各書坊有鏤板始可遍行天下不然則以拘拘背朱為嫌而經術不幸不滅秦火矣又有與霍渭厓書云解詩者無論漢唐宋儒如王氏總聞歐陽本義李黃集解錢氏詩說嚴粲詩輯章邱縣志

卷十六

外編下

三

呂東萊讀詩記有高出朱上者有互相發明者古人於詩之山水制度魚蟲草木詳為之釋而意則欲得之言外故夫虛心活法斷章取義者諸詩之大約也譬諸聞人之言而又轉述於人已不能無訛乃又強定一主意是豈逆志之道哉詩之柄者詩之病也不小序而詩柄焉此世儒之拘見也中麓邃於經學其言如此

同上

渾脫之義予向詳之皇華紀聞闕李中麓開先太僕塞上曲一首云黃河萬里障邊隅黠鹵年來謀計殊不用輕帆并短棹渾脫飛渡只須與與朱秉器中丞河

上楮談所記略同李自注云脫音駝然後知渾脫舞
渾脫帽皆當作平聲也同上

金姬傳一卷常熟楊儀作文極奇麗姬章邛人本李
氏章邛舊志乃楊君謙所撰不載姬事居易錄

章邛縣北一里女郎山有宋隱士穆賓廷秀墓洛陽

王壽卿魯翁題墓表篆書黃魯直有贊刻於碑額明

萬歷間大名董復亨為令移置文昌祠稱二絕按魯

翁祖擇之外孫工篆隸嘗召至京師使篆字說辭以

與王氏學異以布衣終陸友研北雜誌言家有魯翁

篆閑居賦筆力如鈕金屈鐵同上

章邛縣志

卷十六 外編下 三

常白山醴泉寺誌公碑唐開元乙卯立文作齊梁體

可辨者十之三書法圓勁在歐虞間每行凡七十九

字其下多斷齧不存其碑陰乃誌公像也池北偶談

張光啟字元明章邛人世居白雲湖上少為諸生有

名為梅長公朱未孩二公所知崇禎庚辰年四十遂

棄諸生闈一圃曰省園以種樹藝花自樂亂後足不

履城市年八十餘卒有張仲子集詩若干篇予刪存

百餘首往往可傳嘗有句云盡日閑看高士傳一生

怕讀早朝詩即其志可知也同上

百脉泉在章邛縣南明水鎮澄泓一畝清鑑毛髮北

流爲涓水卽繡江也予同年劉石洲渡家回村有繡
江園康熙己巳四月過宿其居題點絳唇詞一闕于
壁云小雨班班垂楊影裏青青麥越阡度陌好箇南
村宅 雁塔同題相對俱頭白今何夕修篁怪石留
我狂吟客同上

章邱縣西北當作東北有寧戚城春秋齊寧戚采邑今縣

有寧氏尚爲巨族余嘗輓從甥甯生一聯云相國悲
歌扣牛角仙人暫死食飛魚次句用列仙傳甯封事

皆甯氏也分廿餘話

補遺

章邱縣志

卷十六

補遺

吉

職官

明教諭陳九職 葛思賢

訓導趙有容 趙叙

縣丞武尚傳

主簿張教

典史任朝用已上七人見萬歷三十二年聚奎樓碑記

副貢

國朝甯振世康熙丁卯科有傳載隱逸補遺

例貢

穆遇春順治年見聖廟碑陰有傳載義行補遺

官階

元潘宗佑國子監博士有傳載文苑補遺

許克修陽朔縣尹有傳載仕績補遺

許可道克修子湖州路推官

許可權克修次子湖廣稅監

楊允鎮江路同知有傳載仕績補遺

楊廷顯允之子紹興路諸暨州儒學學正

人物補遺

孝友

國朝李爾藩字价人監生有至性父之魁好施與能先

章邱縣志

卷十六 人物補遺

七

意承志得親歡其季弟爾俊生方週月卽失恃
維持調護賴以成立其仲弟爾載因重獄被誣
株連不惜破私產爲之昭雪又素尙敦睦能以
德化人故族里數十年從無爭訟者壽至八十
三歲子孫皆列邑庠

甯志榮字若顯幼失怙事母至孝母患痿痺寢疾
十餘年志榮侍湯藥未嘗假他人手母好食魚
輒下數十里求之求亦無不得者兄志富敬事
之凡勞苦之事皆以身任田產多給姪輩已獨
以力學課子爲世業又嘗倡建家祠值乾隆丙

午歲大饑里有劉氏產業已盡矣復欲鬻其妻志榮力阻之佃以居宅助以衣食乃得完聚後劉氏有子旋孤撫之成立壽至八十五歲

〔文苑〕

〔元〕潘宗佑字仲德父彬衛輝路總管府經歷宗佑年十二彬卒既長痛早失怙刻志問學期以所業表見於世家故貧其氣恒振厲不以是苟一介之取至周急則揮所有若素饒者性鯁惡聲無所容在鄉里簡出寡交遊未幾挈所著聞見紀義十卷來京師撼諸貴游超授翰林國史院檢

章邱縣志

卷十六

人物補遺

美

閱秩滿進編修官於私憂尤切嘗欲出位言天下事數爲所厚挽止於是又著遼金鑑畧十卷以洩所懷至大辛亥詔選成均官屬授從仕郎國子博士與同官不相中竟以狷介致疾皇慶十一年卒年四十一歲

據張文忠歸田類稿

〔仕績〕

〔元〕許克修字仲德父全嘗典獄有陰功克修精律學試吏總府綽有幹稱由雲南行省掾調廉州合浦縣尹再調象州路總管經歷二所皆炎荒遐徼殊難靖克修不以中外遐邇異心循職當爲

未再歲學興於鄉農力於野盜不闖境而積年
逋民襁屬來復猶俗爲之不變憲司宣闡爭上
其能故再尹靜江古縣政聞益著先是兩江宣
慰司幕官累以墨敗其潔者往往不職使者病
焉聞克修前績遂辟爲都事贊上勛下裁剽裕
如所部賴以救靜憲府有訟輒移檄使決平心
以理罪者自以爲不寃在幕職三年卽以陽朔
縣致政長子可道授承直郎湖州路推官次子
可權監稅湖廣

楊允性藻潔作事無巨麼必底規矩早學吏視符

章邱縣志

卷十六

人物補遺

七

刺檄牘如夙習者初爲浙江行省掾秩滿爲慈
谿令治尙寬恕人以佛目之歲大禮孛死載路
數州皆然允白帥府馳聞行省獲發倉賑慮未
周又鑄豪室施錢如千患乃稍弭邑中失火延
廟學允以身先衆將赴烈焰會火自滅人謂至
忱所感也再調台州路總管府經歷時朝廷遣
使采訪諸道所至按黜無留員惟允無毫髮及
旣代授平江路推官吳俗輕生多詭故聽訟爲
難允一切以誠心求之常得其情僞竟任未聞
有一寃者一日自以年及慨然返初服制授朝

列大夫鎮江路同知致仕子廷顯紹興路諸賢

州儒學正

已上二人據張文忠歸田類稿

明木潔字廉甫別號雙泉遠祖木虎高琪仕金後人

以避難去虎從木世培章邱潔貌頎而資穎異

舅氏王司空早器之性嗜學旁通術藝弱冠蜚

聲庠序間登嘉靖壬午鄉書數上春官不第因

謁選銓除涿之房山令房山產美石督學胡侍

御檄石房山將勒京兆學宮時任丞攝縣篆應

之潔抵任闖人咎文鑒承上命采石房山咎闖

要取入贄潔不應旋邀潔為杯酒歡潔引手揮

去若將免焉比征役六十意在得直潔白部毋

章邱縣志

卷十六

人物補遺

夫

給遂大憾誣奏潔媚權要擅鑿玉石不法時大

璫高忠肆甚咎闖聲勢相倚激上怒下按臣訛

狀房山人謀叩闕鳴誣憚文鑒莫敢發賴李閣

學史中丞鄭通政知潔寃力持之猶謫戍青州

後數年縣人李選部王侍御為上章白之復其

官而潔卒

據劉相國鴻訓四素山房文集

國朝牛元弼工詩賦為一邑才士康熙壬辰進士任峽

江縣知縣癸卯江西分校鄉闈得士最盛後以

卓異調繁清江峽江士民赴大憲祿留不得遂

立生祠祀之

附見舊志
選舉註下

韓振綱舉人官寧海州訓導教士先德行後文藝以立達為願艱於膏火者嘗周給補助之如楊好生趙子璟皆及門之尤著者於去任後闔學請於州刺史植石學署以紀德政後署登州府教授時洋賈泊舟鹵岸風擁沙屯貨歸無所振綱力請于太守給票令回籍且助以百金故至今洋賈泊登者咸設位於海濱以為功德祀及告歸乃構別墅于珠泉上自號碧松子與一時名流李文藻李其桐娛情詩酒著有碧松子詩章

章邱縣志 卷十六 人物補遺 堯

草敬勝軒制藝珠泉夜話藏于家公弟振茲善行甲于時有別墅曰亦無齋亦時養靜其中同著亦無齋功過格一冊梓行

李鳳舞字奮翮精理學文詞由廩貢任萊州府訓導條教嚴明勤於誘掖任六年致仕歸紳士郊餞汪太守以渾金璞玉扁獎之

義行

明李道字文明生稟孝友好施與以故困者待火婚者待禽亡者待樁閣有凡百待緩急率以為常

子化龍見選舉據那爾來禽
館集增補

謂能承先志焉錦江橋漸傾危倡議重修墊貲累重無難色明右布政李冕墓碑久毀仆爲之重樹而修其墓其留意古蹟嘉惠後學尤多義舉今志實總其事山水一卷乃其編輯辨證頗多惜未藏事而歿時年五十有七

〔隱逸〕

甯振世副貢生品格端嚴閉戶窮經以成就後學爲樂學憲顧扁獎子之葵見選舉附見舊志封贈註下

〔藝術〕

張綜業岐黃嘗裹糧醫人毫無所取子夢白見選

舉

附見舊志封贈註下

章邱縣志

卷十六

義行補遺

全

〔耆壽〕

王斯盛字若松邑諸生慷慨好施尤以成就後學爲樂壽至八十六歲

王紹聞字保嗣監生性端謹以耕讀爲家訓壽至八十餘子大學歲貢孫以均領鄉薦

王殿英字越千邑諸生事繼母以孝聞壽八十六劉柱壽至一百一歲子鳳禮壽至九十七歲

宋彬壽至九十一歲

王世珍監生現年八十餘歲

康素安現年八十二歲

李純德現年八十四歲

列女補遺

節婦

張氏于成章妻二十五歲寡撫子永吉成立守節
至六十五歲乾隆壬子儒學孔扁獎

楊氏韓百儉妻二十八歲寡撫嗣子方文成立道
光十三年邑令吳扁獎

汪氏史光泉妻十七歲寡家貧無子撫夫襁褓弟
振漢成立後廼以振漢之子彥為嗣壽至七十

四歲 劉家龍錄送

王氏甯仔承妻十九歲寡撫嗣子望陶成立守節

章邱縣志

卷十六 列女補遺

全

十七年卒 甯岫齡錄送

張氏胡體倫妻二十七歲寡訓嗣子洞庭成立年

五十二歲卒

李氏柴希郢妻二十三歲寡撫嗣子廣周俾克成
立現年七十歲

孟氏胡克勤妻二十七歲寡以夫姪幹庭為子現
已七十八歲

溫氏張振鐸妻二十五歲寡撫子永湘成立現已
五十七歲 已上李元湘採訪

滿氏焦士毅妻十九歲寡撫遺腹子貫紱成立現

已守節三十年

謝氏史穩妻二十七歲寡撫嗣子芳舉遺腹子業

舉均克成立現已五十六歲

已上陳澄採訪

宮氏焦余興妻三十歲寡現已八十歲

于氏張爾更妻二十八歲寡撫子書年成立現已

六十一歲

劉氏高萃然妻二十六歲寡現已五十五歲

朱氏劉丕凝妻二十歲寡現已守節三十餘年

尹氏李嵐妻二十四歲寡現已七十六歲

鞏氏劉勤修妻二十八歲寡撫子希春後為娶王

章邱縣志

卷十六

列女補遺

全

氏旋故鞏現已五十九歲主現已四十三歲

于氏李濟信妻二十九歲寡撫嗣子發周成立現

已六十三歲

韓氏李佑臣妻二十七歲寡撫嗣子元敬成立現

已守節三十八年

顏氏韓祿妻二十九歲寡子昌明娶史氏生子綸

經而夫婦相繼歿綸娶李氏生二子而綸歿經

娶高氏生三子而經又歿顏守節五十七年歿

李現已六十四歲高已六十歲

已上焦河麟錄送

王氏吳有章妻年二十一歲寡事姑禹氏以孝謹

稱守節四十餘年 吳運周錄送

解氏王允祥妻二十二歲寡撫子克廣成立現已

五十九歲 王元垌錄送

李氏程振麟妻十九歲寡現已六十歲 焦淑琳錄送

烈婦

李氏張璞妻年二十七歲夫亡無子越數日有竊議其不能苦節者李聞之遂赴井死

才女

馬氏劉朝重妻進士馬汝舟女弟家清貧工詩著有寒清詩草一卷子振鏞邑諸生

章邱縣志

卷十六

列女補遺

舍

壽婦

崔氏監生趙珩妻壽至九十八歲

馬氏王紹曾妻壽至八十二歲

苗氏黃發科妻壽至八十四歲

胡氏邑諸生王斯盛妻壽至八十八歲

藝文補遺

記

聚奎樓碑記

明李化龍 邑人

長沙李公序邑志云章邱故濟南近地海岱隩區究所隸境廣輪二百餘里遡赫胥以來上下七百餘禩

風氣盤鬱文獻之淵藪也余邑人固不敢附公揚扝私爲邑里光嘗載詢故老誠有如李公所云者洎嘉隆後人文雖曰不乏然較古稍稍不逮而章逢輩率以無嘉惠後學而歸之氣運屬者婺源游公君侯奉除書來牧茲邑踰稔餘訟平事理吏安民和於是諸章逢翁焉跂君侯以文治君侯亦以職所夙夜者惟造士而率民故孳孳恒不怠文治爲事凡激厲勸課不孫匡直勞來遺典一時章逢士烝烝斐然鄉風迄壬寅杪秋復集邑薦紳士夫謀賢之與方欲營樓而祀以文昌薦紳士夫曰凡事不足以章軌物關政教章邛縣志

卷十六

藝文補遺

全

則不舉焉使君茲舉足翊翼文明調燮風氣至隆重至寵渥也又曷計焉君侯乃鳩工聚材因雉堞而崇之其經營皆君侯祿食之美與諸薦紳士夫所願助者越明年癸卯之闌暑樓成中像以文昌額曰聚奎茲樓也岱嶽矗南金輿峙西北則拱以女郎東則帶以繡水一覽而章之形勝悉種種獻音卽非青烏家亦知其爲屯靈秀鬱風雲之區也方之齊雲落星不得與此爭壯金馬碧鷄不得與此並靈矣落之時會縣官使者將比士於棘闈君侯卽具牲帛俎豆禮借掌諭陳君與佐諭兩趙君率章逢士於斯而奠之卽

里選章逢士於斯而祖之君侯曰文運其復昌矣及此竣與薦果獲若而人不斌斌盛乎繫按文昌帝君乃清河叟子家潼川游七曲而得道紀所顯化凡爲士夫身者一十七世實陰宰文衡而敷張顯報也矧先帝嘗以其像賜祠部令海內士尸祝之以表其靈是役也固非魯人之謔封禪蜀人之快叢祠也君侯茲舉豈特仰承先帝爲忠治祀勵士爲禮而窺天察地幹旋造化俾將衰之運蔚爲醲郁章之章逢士則不惟乞靈於文昌亦將佩君侯之功於無窮矣今君侯已上計者再還邑待次天官竚有不次之擢乘鳧章耶縣志

卷十六

藝文補遺

六

翻然而去然其意則嘉惠章逢者無已乃屬余碑以佈之余聞文昌垂誠者曰豐祭祀而格神祇宮殿樓觀務碧瓦之翬飛陛戟岩廊誇朱闌之雕翠從茲末務失其本真吾願諸章逢士得之崇祀之外則君侯爲樓之意庶無負云

龍灣記

國朝

于秉信

邑人

龍灣者予村東之石溪也方逾半畝深可丈餘兩溪相望水聲宛接俗呼大小龍灣且云石底與海水通蓋相傳者舊矣而水經不載酈元弗作固難與辨真妄也緣溪而上卽爲發源之所其自絕壁滴下者若

垂露其自石罅湧出者若激湍兩岸對峙南北危石
嶙峋又如竒鬼猛獸怒欲搏人是未可一 二竟也余
之別此而客他鄉有年矣茲歲辛卯伏雨經旬晴午
後水色連天蟬聲滿樹宅邊徙倚久之青絲携壺乃
得邀友人遊所謂龍灣者以彼當盛夏時野水驟漲
波濤洶湧不殊瀑布之飛自廬山至若雨歇東臯雲
收天末窾坎鞞鞞之聲又宛類石鐘之鳴於江側流
連旣久解衣就浴泛酒其中而樂之乃呼友人而謂
之曰子亦知此溪之盛乎雖吳王銷夏之灣無以過
也昔唐賢右丞集中行到水窮處坐看雲起時又云

章邱縣志

卷十六

藝文補遺

七

山中一夜雨樹杪百重泉如斯者亦差堪髣髴矣藉
令當此之時沿流窮源有所謂摩詰其人者必且以
清泉石上之流繪之爲圖敲之爲詩而傳之字內幾
與輞川並著豈尙復沒沒也奈何戲沙者稚子把竿
者漁人旣日接膝而不相知卽知之亦未能言而二
三士夫之來此地者又或尋常目之初不聞臨流之
詩歌偶存別錄物之有幸有不幸大率類斯也可不
惜哉友人視余而笑曰聞君垂情風騷凡廉泉讓水
之在其鄉者靡不逞一韻之竒矜一字之巧亦幾連
篇累牘積案盈箱矣而奚囊所貯左方所載若與此

淡漠相遭者是亦子之舍近而圖遠也其又誰尤余聞之茫無以應乃更枕石漱流低徊而不能去蓋臨文嗟悼不勝感慨係之云

啟

上巡撫議罷挑河啟

國朝

何天衢

充沂道

竊職道前奉檄飭查小清河改入繡江彙歸大清河入海有無妨碍又奉檄飭以陳愷溝一處若相勢疏通較劉各務等庄尤爲簡便而署章邱張令又復聲明窒碍飭委職道一併查勘究應如何興挑可以永除水患職遵卽帶同原估之張州判前赴章邱齊東

章邱縣志

卷十六

藝文補遺

全

一帶周履詳勘旋據兩邑士民紛紛呈懇痛言改道之害章邱齊東兩張令亦力陳其不可與職道所勘情形均相脗合不獨改入繡江彙歸大清河入海於章邱齊東有碍卽由陳愷溝引入大清河可無碍於章邱而於齊東則爲害不小請得而詳陳之查小清河起自章邱長白山源出東陵楊官庄匯天倉嶺水合流經普濟鎮博平等莊蜿蜒而下其間山水支流共有二十二道均歸正河每逢伏秋陰雨漲發靡常至山頭店方合爲一更無支流至韋駝莊河身始窄故韋駝橋西頭有洩水溝一道以減盛漲以上均係

淡漠相遭者是亦子之舍近而圖遠也其又誰尤余聞之茫無以應乃更枕石漱流低徊而不能去蓋臨文嗟悼不勝感慨係之云

啟

上巡撫議罷挑河啟

國朝

何天衢

道充沂

竊職道前奉檄飭查小清河改入繡江彙歸大清河入海有無妨碍又奉檄飭以陳愷溝一處若相勢疏通較劉各務等庄尤爲簡便而署章邱張令又復聲明窒碍飭委職道一併查勘究應如何與挑可以永除水患職遵卽帶同原估之張州判前赴章邱齊東

章邱縣志

卷十六

藝文補遺

全

一帶周履詳勘旋據兩邑士民紛紛呈懇痛言改道之害章邱齊東兩張令亦力陳其不可與職道所勘情形均相脗合不獨改入繡江彙歸大清河入海於章邱齊東有碍卽由陳愷溝引入大清河可無碍於章邱而於齊東則爲害不小請得而詳陳之查小清河起自章邱長白山源出東陵楊官庄匯天倉嶺水合流經普濟鎮博平等莊蜿蜒而下其間山水支流共有二十二道均歸正河每逢伏秋陰雨漲發靡常至山頭店方合爲一更無支流至韋駝莊河身始窄故韋駝橋西頭有洩水溝一道以減盛漲以上均係

費省而功易巖且得永除積害豈非該吏民之大願而事關創始利害甚鉅有不容不熟圖而計者查小清正河本自南而東北潞山泊又居其東繡江河則居其西今改入繡江彙歸大清河入海是自東而西又自西而東北已不免過於紆折且查繡江河發源於章邱之百脈泉至湛王莊又會合東西兩麻灣水匯爲一河至金盤莊又併入爪漏河以歸大清河爪漏河發源於章邱之長城嶺大寨自準村匯平頂錦屏等山十數道之水合成一河夏月山水漲發勢甚浩瀚自金盤莊至東關橋河身又復收窄雨多之年

章邱縣志

卷十六

藝文補遺

六

橋輒淹沒且又逼近縣城故自東關以下設有船王莊口涓頭陳家莊三處洩水溝以殺其勢而大清河盛漲之時猶且倒漾十餘里以致上游頂阻不免漫溢若再加一小清河則勢益汪洋卽展寬兩岸亦難容納况小清河與繡江河之洩水溝皆自南而北若將小清河挽而之西復築堤以橫截之則水無所洩爲害滋甚且以數十年石砌灰築之老堤而易以新土堤卽使堅實完固豈能及其十之三四現據張州判所勘改道之處均係膏腴之地村莊稠密墳墓纍纍雖舉大事者不計小利害棄擲良田亦所不惜而

墳墓必須繞避則河身益多灣曲夫前此順水之性暢流下注又有老灰岸以禦之猶難必其無害今欲逆水之性迂迴曲折而以新土堤禦之能保其必不爲害乎且自劉各務挑河改道則劉各務以下十餘里之田畝不能資其灌注而此千百家之村莊又恐不免衝潰是棄已成之利而且貽將來之害計亦左矣此小清河萬難改併繡江河之實在情形也至由陳愷溝引入大清河較之改併繡江似爲簡便然亦有不可行者查章邱齊東兩邑志書俱載有此議始於前明萬歷戊戌鄒平姚令其時以齊東令白鷗力

章邱縣志

卷十六

藝文補遺

五

阻而罷逮乾隆五十四年章邱縣民楊大志等又倡此議經長前憲檄委確勘以齊東士民胡翠劉允善等數百人力懇而罷嘉慶三年章邱縣民楊大臣等又倡此議復經章邱鄒平兩邑令勘明不可其事始息其所以屢議而卒不能行者緣齊東縣墻三面皆水大清河蕩其北減水河瀉其南埧水河又繞其西每逢久雨之年三河交溢百渠橫流居民爲之大困而大清河逼近城隅爲害尤甚前明時因河水漲發沖刷城垣將城移築近裏乾隆二十六年城東北隅又被大清河沖刷復加移近並建石埧二座以擋水

勢現已冲壞一座河水仍逼近城脚一值河水漲發勢甚可虞其減水河上接陳愷溝下注大清河所以收洩坡水若大清河山水暴發不惟坡水不能下注河水且將倒漾而齊東地多窪下近河四十餘里無不被淹若再益以小清河勢且泛溢無已况大小清河皆係山水若使會而爲一則暑雨盛行兩河並漲頂阻漫淹爲患更大况章邱高而齊東低建甌直下沛然莫禦即使堤岸堅完河身深濶而雨水並漲亦難免於漫決不獨民田被淹城垣尤大可慮此小清河又難改由陳愷溝入大清河之實在情形也正河

章邱縣志

卷十六

藝文補遺

五

既難興挑改道又多窒礙然則泲山泊附近之民田遂可坐視其淹害而不一拯乎查泲山泊爲衆流滙聚之處其漫溢之故不僅小清河也雖民田未免不害而蘆葦蒲茨魚蝦之利所資於無業窮民者正復不少其利害亦畧相當矣况此舉原以爲民今民情既所不願時勢又有所難似宜暫停以俟他日職道檇昧寡識卽有一得曷裨高深而管窺所及亦不敢隱默謹將查勘小清河改併繡江彙歸大清河及改由陳愷溝引入大清河均難辦理情形據實稟覆

逢原張公墓誌銘

據來禽館明集節錄

邢

伺臨邑人

往歲公車騎過臨邑款門相視余出斗酒勞焉公引
滿數竿慷慨而談天下事謂今可慮莫九邊若貢市
徒自愚安能愚虜今宜求下賤會何策下愛閩氏何
策下兒單于何策下呼衍須卜諸種姓何策夫我局
紙上言而虜真能謏詠以包敵我蒲弓紙羽而虜真
能使馬如熊彪我衰糲乾餒背人自哺而虜脯酪每
逝口交嘗及遍將安較勝負哉夫靳釜鐵予粵毋予
上黨似矣今虜上黨釜豈勝用猶夫漢稱牛馬予牡
毋予牝彼南粵于時牝寧可勝用乎夫糜金錢者疲
弱卒也疲弱自可名存實空爲可恨耳語旣獻歛罷

章邱縣志

卷十六

藝文補遺

叁

酒距今且七八年余嗟然在耳今安得起公九原使
辨賊辨賊公逝之日邑里爲罷春杵卽位而哭者疏
賤盈千人所論著甚富仕優應急二稿先已刷行公
子伯仲以胡先生狀問余余卒狀出入左班典法雍
容余執筆惡焉以諸公子請不得辭後之攬者去志
存狀庶稱良悖諸公子咸負僑異聲非久次第名域
中竟何須此誦誦言銘曰風領端然淵漚泓然文理
察然倫鑒皎然孰是方致來試宓絃舟獲長年民歌
所天久而稍遷郎曹置員弗曲以拳畫指平平司厥
津癘目藐刀錢我有賓筵二簋雙邊厥積考考爲諸

庾先東夸撫艱我饗我魁寇借猷宣妥此居廊中使
憑祆靡我腥羶孰云便媼敢我作緣勤徹司銓爰抗
西旃我邁屯適我馬言旋嗛兮勒燕塔然卽田洛社
相沿共虞華顛疾痰連牽厥命弗延國失靈箠里喪
大賢我人涕漣憂心如縣家學陶甄孝秀聯駢庶其
八埏全昌得全我體雖捐我神永綿生笑粥饘詒厥
櫬椽不忘不愆先民永詮營此中穿樂石載鐫子孫
億千原廡祠獨

詩

懷伊鈍菴一韻二首

明李開先 邑人

章邱縣志

卷十六

藝文補遺

古

鈍菴初姓趙改復爲伊嘗尹予邑有惠政云

不急繩難斷隨宜絃屢更從伊新復姓爲尹舊知名

雙鳥同鳧至一琴伴鶴鳴華階從此始不日位公卿

交誼邱山重別來歲月更一官猶踴躍

原註云鈍菴乃近自憲副

左遷歷任總聲名宰邑昔三善驚人今一鳴莫須輕去

國千載效虞卿

原註云鈍菴會云以欲執間之意子復書勸止之

贈張雲霞鍊師二首

相隨道友訪蓬壺煉藥長臨太乙爐柱史將歸關令

識麻姑曾降蔡經無遠遊衣帶三江色靜養珍藏五

岳圖家在梁園何足戀求仙自古棄妻孥

遁居道觀侍元君海鶴丰姿迥出羣採藥朝遊三十
載燃藜夜讀五千文眉間道氣人爭覩肘後仙方世
未聞本爲逃名名自著餘霞散作一天雲

夜發東陵山

國朝 張士第 邑人

東陵山峙東山東筋骨峻峭窮鬼工千仞突出羣峰
中削如掌指摩蒼穹此山人跡罕可到但聞風吼豺
狼叢叢林老樹秋瑟瑟雲烟起處青山失長白雨聲
萬壑流昏黑攀躋跬步愁聞說曉月御山阿朔日子
夜奈晦何須臾東山白如練道是曦馭扶桑見崮呀
山頭幾曙峯漏洩春山何處鐘歸路依微望山寺草
章邱縣志

卷十六

藝文補遺

奎

深古刹有僧春大僧進我脫粟飯小僧相送出蒙茸
蜀道蠶叢寧詎殊絕竒絕險意踟躕從此名山訪禽
向何須凌閣畫麟圖

遊長白山

國朝 施閏章

雨後明霞冉冉紅浮雲猶裊半山中多年夢想赤松
子何處招尋白兔公列嶂臨城餘礪雪虛巖向海吸
天風從來副嶽誇形勝杖策憑陵誰與同

繡江春漲

國朝 鍾運泰 邑令

積雨連朝霽色開攬衣撫景上高臺一天春捲千堆
雪三月晴轟兩岸雷柳葉綠舒侵翠幕桃花紅綻映

金鑿觀瀾琢句思無限把酒臨江笑幾回

〔金石補遺〕

段徽碑

在縣治西南六十餘里何二莊西北

右碑首座俱失身高九尺六寸寬四尺一寸行書共三十行

左書故廣威將軍濟南路行臺參議官段公神道碑銘并序濟南路參議前進士張泰亨撰并書末書己未年三月十三日立

碑文云惟人秉天地英靈之氣以生其才固有所用而已然而非得其時得其地而欲展盡底蘊以

章邱縣志

卷十六

藝文補遺

矣

立功名於當世者亦難矣哉若夫版築飯牛躬耕屠釣之士一旦蒙人之知被時之用離疏釋躄而享膏粱剖符錫壤而受爵位功光祖宗澤流後裔者古人誠有之今段公其殆庶幾乎公諱徽字君美其先景州阜城人也遠祖避後周顯德年間河溢之患舉族遷於濟南章邱縣嶺山之西因家焉大父諱欽以立農爲業父諱楫字巨川嘗爲濟南錄事功曹母王氏公年十五亡其母年十八父亦卒公雖畸孤卓然有自立之志幼閑刀筆書數精通吏事性廉潔謹愿鄉人皆愛之甫冠推爲歷城

縣掾史年未三十值金季貞祐初山東州縣悉爲
塞北之馬蹂踐殆盡而濟南亦陷公時逃難於南
山山谷間而僅獲免繼而燕城失守南狩汴梁復
遣侯公來守東平將安撫餘黎收復河北公亦被
驅策是時盜賊充斥所在嘯聚公憫良民被害者
衆乃以方畧誘致渠魁効順而民得少安侯公以
勞績遷公忠勇校尉充濟南章邱縣主簿秩滿赴
河南調再授開州漢陽縣丞未及天下復擾屬天
朝開剗河北悉臣屬之有濟南大行臺清河公素
與公相善知公有經濟之才乃辟爲幕府經歷後
累有功乃授廣威將軍充行臺參議官公嘗從行
臺公開拓疆土近數千餘里得大小州城十有餘
處居民數十萬口皆公贊畫之力後至庚寅年行
臺公北覲戎輅公亦從行先是有濟南隣境一主
將其人者在離亂時嘗率衆侵我濟南之田爲清
河公奪其田而攻擊之彼力不能支心嘗憾之至
是將訟於上前清河公亦欲與之直公因言於行
臺公曰春秋以善隣結好息民爲美今吾民瘡痍
未蘇爭之恐近邊人心弗安訟何時已莫若姑恕
之以紓民憂徐爲後圖公許之訟乃寢旣歸遂嬰

其地分其民以與之至今彼猶德之厥後行臺公南伐公以大葬事未畢弗克就行旣而有檄召公甚速公亟往之路見有軍士逃歸者公皆撫諭使廻旣見行臺公行臺公曰吾奉命出征軍人往往路次竄歸爲之奈何公曰人情誰不欲安緣連年征討畧無暇日民不勝其困加之歲饑衣食弗能自給以致然耳願公出財物以賞賚之庶可安然行臺公然之乃悉出隨軍所有銀絹例加錫予軍士乃安逃者聞之往往復還及壬辰河南平師旋迨丙申年遂自水柵移治於濟南舊所公以荒亂

甫定之後人心稔惡弗悛於是一新法度號令使民知所畏復繕修城池官署倉廩府庫無不完備而乃幹桑麻魚鹽之利以厚民財積芻茭糗糧之用以備歲計而又均戶之貧富而科稅賦驗丁之多寡以給徭役不數年民皆按堵如故事行臺清河氏三世前後凡三十餘年夙夜奉公始終如一深得爲政之體故濟南一境比他州號爲最治每上計偕考課稱爲第一公以年老告退未許開時年七十二歲丙辰年六月三日以病卒於家官給賻贈威儀畢具越是年六月五日葬於喻山祖塋

之次禮也公娶時氏生五男長曰祺次曰禋襲爵授歷城縣丞次日曰禧未仕次日曰裕早世次日曰禎未仕五女長適賀氏早卒次適行臺公次子邳州行軍萬戶張邦直次適分治高苑縣令新城張晉次適鄒平縣張尉男灝次幼未適初公一日嘗會諸親而謂曰兵革後吾族俱安加以我自寒素中起身久居要職三十餘年子孫昌盛生計稍溫皆我祖宗陰德之所致今枝葉分散別立塋兆者已九處矣恐後世歲久亂其枝派有關祖先之祭祀今列叙遠近尊卑宗枝畫爲圖牒礮石已立於塋次

章邱縣志

卷十六

金石補遺

先

凡我子孫常思遺訓春秋祭祀奉之無忽公風姿魁偉鬚髯秀整見之者莫不儼然然性本寬厚長者無文吏刻薄之風至於待物接人怡顏順色溫溫如也故其治民大率止貴清淨不擾而已是以隣境之政多矜式而倣倣焉及死之日無遠近聞者莫不歔歔流涕其感人心深也如此蓋段氏世系出於春秋時魏大夫段干木之裔源流蔓衍散布天下自秦漢晉魏隋唐以降迄於今其間名賢偉士如段熲之爲良將段秀實之爲忠臣代不乏人難以槩舉故畧表而出之以示後來云爾是宜

系之以銘銘曰猗歟段公玉潔金貞一時運際爲
齊鈞衡帷幄深謨干戈竒績用贊厥成皆公之力
外輯軍士內甸邦民不勞而治皆公之仁䟽爲祥
風霈爲膏雨物賴以生式歌且舞三十餘年茂德
元功富貴壽考天令其終嶮山未平遺澤未竭千
秋萬年子孫其繼之